

no. 25
IVSTIFICATION

DE LA GVERRE ENTREPRISE,
COMMENCEE ET POVRSVIVIE SOVZ
la conduicte de tres-valeureux & debonnaire
Prince Monseigneur le Duc de Mayenne.

*Par les Catholiques de la France contre les Heretiques leurs
defenseurs, fauteurs, complices & allies, contenant
responce aux raisons amenees par les Politiques
contre icelle guerre & entreprise.*




A PARIS,

chez Guillaume Chaudiere, rue S. Iaqués, à l'en-
seigne du Temps, & de l'Homme Sauuagé.

M. D. LXXXIX.

AVEC PERMISSION.





IVSTIFICATION DE LA
guerre entreprise, commēcée & pour-
suiuie souz la conduiēte de tresualeu-
reux & debonnaire Prince Monsei-
gneur le Duc de Mayenne par les
Catholiques de la France, contre les
heretiques, leurs defenseurs, fau-
teurs, complices & alliez, contenant
responce aux raisons amenees par les
Politiques contre icelle guerre &
entreprise.

LES Heretiques avec leurs amis les
Politiques modernes, qui sont en
trop grand nombre maintenant en
France, pour empescher l'effect de
la sainte Vnion, commencee & heureusement
establie entre les Catholiques François, à l'ex-
tirpation des heresies & extermination de tous
heretiques & sectaires au Royaume de France,
mettent en auant plusieurs raisons, par lesquel-
les ils taschent persuader au peuple, que ceste
guerre commencee contr'eux n'est pas iuste &
legitime, ains que pour vne infinité des incon-

4

teniens, lesquels ils proposent, elle doit estre euitee, fuie, & reiettee du tout, comme chose pleine des perils & scandales tresmanifestes.

1. Et en premier lieu, ils disent, que la guerre ne doit iamais estre faicte ny entreprinse, sinon alors que la necessité nous y contrainct: mais que ceste guerre a esté entreprise sans aucune necessité, les Catholiques & Huguenots viuás paisiblement ensemble en vertu de l'Edict de Pacification estably par le Roy.

2. Secondement, que ceste guerre, pour estre intestine & ciuile est plus dangereuse, que si elle estoit contre l'estranger, & pourtant doit estre sur tout euitee; Ioinct que la partie aduersé à cause des Politiques & autres qui ont suiuy le feu Tyran, & suiuet encore cestuy de Nauarre, est tresforte maintenant en France.

D'auantage, que toute guerre, pour la rendre iuste & legitime, doit estre faicte par l'autorité & commandement du superieur, & nō contre le Roy & Seigneur, auquel toute obeyssance est deuë, iagoit qu'il soit mauuais & de mœurs corrompuës.

4. Encore l'euenement de toute guerre est incertain & hazardeux, Dieu donnant la victoire à qui bon luy semble, & pour les pechez de ceux qui ont plus iuste querelle, permettant quelquefois qu'ils soient vaincus des malins & mal fondez en droict. Et que pourtant, la guerre ne doit pas estre commencee, ou l'on peut viure en paix, & passer le reste de nostre vie en repos, iouyssant de nos biens & moyens à

nostre aise & contentement.

Et en dernier lieu [pour euitier prolixité par vn plus ample recit de telles allegations] ils franchissent le sault & disent rondement, que la guerre ne se doit pas commencer pour la religion, pour ce qu'elle est si bien plantee en la France [disent-ils] qu'il n'est possible de l'exterminer par diligence, ruse, ou cruauté que l'heretique scauroit practiquer à l'encontre d'elle. Ioinct que l'heretique & nous sommes d'accord aux poincts principaux de la foy, & que nous ne deuons faire guerre pour quelques opinions diuisez qu'ils tiennent d'avec nous, pour ce qu'il ne chault par quelle prudence lon cherche la verité, & que lon peut paruenir à vn si grand mystere par diuers chemins.

Voicy les principales raisons dont ils se fondent, pour faire trouuer mauuaise & dure à digerer ceste guerre au peuple Catholique, qui ne scauroit trop bien discerner le blanc d'avec le noir, & qui pour les incommoditez qu'ils sentent desia, faute de la trafficque & commerce ordinaire qu'ils souloient auoir plus libre, que la guerre ne le permet, seroient trefaisies de trouuer vne bonne paix. Mais quant tu auras eu la patience [amy Lecteur] de lire nos respōces à leurs raisons, tu ne les trouueras pas telles comme ils les preschent; Et tant s'en faut qu'elles te doiuent aucunement esbranler en la bonne opinion, laquelle comme bon Catholique tu as & doibs auoir de la sainte Vniō, qu'au contraire, tu te trouueras mieux confirmé

(comme i'espere) en ta sainte & salutaire delibération.

Et quant à la premiere raison, i'accorde à nos Politiques modernes, que la guerre ne se doit entreprendre sinon par necessité. Car (comme dit tresbien monsieur saint Augustin) d'auoir paix, depend de la volonté. Mais la guerre doit estre par necessité, afin que Dieu nous deliure de la necessité, & nous conserue en paix. Par ce que lon ne cherche pas la paix, dit il, pour exercer la guerre, mais on fait la guerre pour obtenir paix. Mais que ceste guerre Catholique, dõt nous parlons, soit entreprise sans aucune necessité, ie le nie tout à plat, & afferme, que s'il s'est oncques trouuee iuste occasion de faire guerre, elle se trouue en ceste guerre entreprise par les Catholiques. Car tant s'en faut que la paix eüe avec les heretiques en vertu de l'Edict de Pacification se doine appeller paix, que nous deuons preferer toute sorte de guerre à telle paix. Attendu que (selon la confession des heretiques mesmes) l'Edict de Pacification, au lieu d'estre moyen de preuenir les maux qui menaçoient la France, a esté tourné en occasion de plus grandes calamitez qui y aduiendront oncques. Car par ce malheureux Edict, les heretiques, qui par la deuë pratique & execution des loix Imperialles, & saintes Canons de l'Eglise deuoient estre chastiez & r'appellez à l'vniré de leur mere, ont eu le loisir & moyen de corrompre & infecter plusieurs Catholiques, & empescher la conuersion d'aucuns qui, sans

esponce à la
emiere rai-
12.
pistol. 1. ad
onifacium
in. noli exi-
mare 23.
1.

beliniere li
7. de l'hi-
re de Frã-
in l'ã 1562

eux, se fussent reconciliez à Dieu & son espouse
 l'Eglise. Par cest Edict pernicieux on a osté la
 commodité & moyen de corriger les hereti-
 ques & estaindre leurs heresies, & leur a esté
 donnee licence de continuer & perir en icelles.
 Car l'experience nous enseigne, que d'esparg-
 ner l'heretique, quand on peut obuier à sa ma-
 lice, & chastier sa peruersité, n'est autre chose
 que fauorizer son impieté. C'est pourquoy
 l'Empereur Theodose ne voulut pas escouter à
 aucuns Euesques, qui taschoient de le faire vn
 peu moderer la loy, par laquelle il condamnoit
 tous heretiques en amende de douze liures d'or;
 choisissant plustost [dit monsieur saint Augu-
 stin] de corriger l'erreur de telle impieté par ses
 trespieuses loix, & de contraindre ceux qui
 auoient porté les enseignes de Iesus Christ
 contre luy, à retourner à l'vnité Catholique par
 terreur & chastiment, que de leur oster seule-
 ment la licence d'exercer cruauté, & leur don-
 ner permission d'errer & perir. Ce n'est pas
 donc paix qui donne licence de mal faire, & de
 causer vne trespornicieuse guerre; Ce n'est pas
 paix Chrestienne, qui donne licence de conti-
 nuer guerre contre Dieu, son Eglise & saints.
 Ce n'est pas paix avec des hommes qui nourrit
 & entretient vn schisme & sedition contre l'E-
 glise, qui produit vne cōtinuelle contention &
 debat en doctrine; qui de ceux qui doiuent estre
 vnanimés en Iesus Christ, professant vne mes-
 me religion, fait plusieurs chefs tous discrepant
 l'vn d'auec l'autre, & deschirant l'vnité de l'E-

*Can. qui po-
 test. 23. q. 3.*

*In Epistolan
 50. & 48.*

glise, pour laquelle Iesus Christ endura mort & passion. Brief il n'y a rien plus esloigné de la vraye paix des Chrestiens, & de la conseruatiō du troupeau Catholique, que de permettre les lepreux conuerſer avec eux, attendu que les lepreux doiuent estre chassez hors de l'Eglise, comme fut le Roy Ozias par le grand Prestre Azarias, asistē des autres Prestres. Et selon la doctrine de saint Augustin, tous heretiques sont reputez pour lepreux, cependant que ne ayant pas la science de la vraye foy, ils professent diuerſes doctrines d'erreur. Et si lon me veut alleguer l'Interim accordē par l'Empereur Charles le Quint aux Protestans d'Allemagne, & comme les Catholiques d'Allemagne ont paisiblement vescu depuis avec les Protestans, comme ils font encore; le respons, que tel faict de l'Empereur Charles doit seruir d'exemple à tous autres Princes Catholiques, de se donner garde de faire iamais la pareille, & d'apprendre qu'il vaut beaucoup mieux d'obuier du commencement aux entreprises si pernicieuses, que de s'en repentir sur le tard (comme feist ledit Empereur) apres auoir estably chose si scandaleuse & preiudiciable à la vraye religion. Car bien que l'Empereur ne permit pas à tous les Protestans d'Allemagne indistinctement libre exercice de leur erreur, (comme feist cest Edict de Pacification aux Caluinistes en France) ains à ceux tant seulement qui ne professoient le Lutheranisme en rien, sinon en deux poincts, à ſcavoir, qu'ils permettoient aux hommes lais de communier

Paralip.

ap. 26.

August. lib.

qu. euāgel.

communier souz les deux especes, & aux Prestres d'auoir femmes, & ce non pour tousiours, ains comme par voye de toleration, iusques au premier Concile general ensuiuant. Combien, dis-ie, que l'Edict de l'Empereur ne contenoit autre chose en faueur des Lutheriens, si est-il, toutesfois que leur Theologues donnerent occasion que le bon Prince s'est fort repenty de ce qu'il leur auoit accordé. Car tant s'en faut qu'ils gardassent leur promesse de se conformer aux Decrets du Concile general de Trente, que corrigeant la teneur de ce que l'Empereur leur auoit accordé, ils composerent vn Interim à leur discretion, y adioustant plus de la doctrine de Luther, que ne leur estoit permis, sans se vouloir oncques conformer autrement à l'Eglise, comme ils auoient promis à l'Empereur. Si donc l'Empereur Charles s'est grandement repenty, pour auoir seulement permis aux Protestans deux articles contraires à la Catholique doctrine iusques au Concile de Trente. A plus forte raison doiuent les Rois de France se repentir d'auoir permis aux Huguenots libre exercice de toute l'heresie de Calvin. Et pour ce, que ceste permission est plus pernicieuse, & contient plus grande impieté de beaucoup que ne contenoit pas celle de l'Empereur Charles. Et pour ce que les Huguenots n'ont esté plus soigneux de garder leur Edict de Pacification, qu'auoient esté les Protestans en l'observation de leur Interim, ains ont esté beaucoup plus perfides & desloyaux en cest endroit, que ne

furent oncques les Protestans d'Allemaigne,
 comme sçait tout le monde. De maniere que
 leur Edict de Pacification n'a esté autre chose,
 qu'un vray subiet de la plus dangereuse guerre
 qu'onques experimenta la France. Et la guerre
 Catholique maintenant entreprise pour l'ex-
 termination d'heresie, ne regarde rien moins
 que le reſtabliſſement d'un tel Edict, comme
 les guerres precedentes ont fait par la maligni-
 té de ceux qui lors auoient trop grand credit en
 court: Mais elle tend à ceste fin & but, que par
 l'extirpation d'heresie selon les ſaincts Canons
 de l'Eglise, & les conſtitutions des Catholiques
 Emperours & Rois, nous puiſſions iouyr d'une
 vraye & Chreſtienne paix, ſans toute deſſiance,
 perfidie, haine & trahiſon, comme eſt celle qui
 a eſté faicte avec les heretiques, par le malheu-
 reux Edict de Ianuier, extorqué par la ruze &
 fineſſe d'iceux, durant la minorité du feu Roy
 Charles, contre l'aduiſ des plus grâds & zelez
 Seigneurs Catholiques tant ſeculiers qu'Eccle-
 ſiaſtiques, & impieusement obſerué ſouz le re-
 gne de ſon frere Henry, eſtant & d'aage & in-
 gement ſuffiſant pour diſcerner l'impieté que
 telle ordonnance contenoit, & de force plus
 que ſuffiſante pour l'abolir, & ſuiuant la requē-
 ſte de ſes Catholiques ſubiets eſtablir le ſeul
 exercice d'une meſme Catholique religion par
 tout le Royaume de France. Car comment
 eſt-il poſſible d'auoir paix avec le diable? quel
 accord ou conuenance y a-il entre Dieu & Be-
 lial, entre Ieſus Chriſt & l'Antechriſt? entre

l'Eglise de Dieu & la Synagogue de Sathan? Les saintes Escriptures & tesmoignages de nos maieurs nous commandent de fuir la compagnie des heretiques, de les detester & auoir en horreur, de crainte que par leur contagion ils ne contaminent l'innocent & sain troupeau de Iesus Christ. Et seront nous dispensez par vn malheureux Edict de quelque prince mondain de faire le contraire? peut l'ordonnance d'un Roy terrestre nous licencier à enfreindre celle du Roy du ciel? Toutes les guerres quasi lesquelles nous lisons auoir esté faictes par les enfans d'Israel au vieil Testament, ont esté pour la deffense de l'honneur & religion de Dieu contre les Idolatres & obseruateurs de faulxe religion. Et reputerons nous la guerre illicite, ou la paix bonne qui se fera contre, ou avec les heretiques? La guerre donc faite contre tels, est & sera tousiours licite & necessaire, & la paix au contraire, comme chose illicite & condamnée par la parole de Dieu, doit estre euee & fuyee avec eux. Et ceux qui font autrement, outre ce qu'ils se trouueront fort abusez, s'ils pensent estre possible de viure & conuerser paisiblement avec telles gens, ils encourront les censures de l'Eglise, & comme infracteurs de la parole de Dieu & des saints Canons, (lesquels par presumption ils auront violé) sont anathematizez & condamnez par le saint Esprit, permettant par leur conuiuence aux heretiques de errer & perir en leurs heresies, comme lon voit maintenant en Allemaigne.

Ad Titum

cap. 3.

Leo 9. in ser-

monone contra

heresim, Eu-

rychetis, Et

Vincentius

Lirinens. ad-

uersus prosa-

heres. noma.

Can. violat

res & can. g

nerali. 25. q.

*Responce à la
2. raison.*

Et pour respondre au second poinct. Tout ainsi comme ie sçay bien que la guerre domestique & intestine est plus dangereuse que celle qui est faite avec l'estranger, aussi faut-il dire, que quand aucuns mauuais & desloyaux citoyens brassent quelque trahison & sedition contre la patrie, on ne les doit pas laisser faire ce qu'ils voudroient. Car autrement, Ciceron seroit blasmé pour anoir descouuerte la coniuration de Cataline, & le Senat Romain auroit mal fait, de faire guerre contre luy. Mais pour autant que la conspiration peut causer vn grand detrimēt à la Republique, & si lon n'y met ordre en toute diligence, pourchasser la ruine de l'estat, la guerre est tres-necessaire contre les ennemis de la patrie, & doit estre d'autāt plus diligemment executee, que la Republique peut receuoir plus grand dommage par l'ennemy domestique, qu'elle ne sçauoit endurer de l'estranger. Or sans comparaison l'heretique nous est le plus dangereux ennemy domestique que sçaurions auoir. Car les autres ennemis conspirerent seulement contre la police ciuile de la Republique, brassant quelque trahison contre le Prince ou Magistrat seculier. Mais l'heretique conspire contre la police spirituelle, s'attaquant à Dieu & à son Eglise, cōtre lesquels il commet trahison, offensant la Majesté diuine. Les autres qui commettent le crime de leze Majesté humaine contre la personne du Prince, ou contre l'Estat du païs, sont pour la pluspart bien tost descouverts, & par la punition exemplaire de

quelques chefs, la sedition est bien tost appa-
 see, & tout est mis en repos. Mais les hereti-
 ques se font bien d'autre naturel, & pour la puni-
 tion de quelques vns, les autres ne se corrigent
 gueres, ains quoy que pour quelque temps ils
 scauent cauteleusement dissimuler leur creace,
 ils ne laisseront pourtant de faire en secret ce
 qu'ils pensent, & en attendant telle commodité
 qu'ils desireront, ne cesseront de corrompre & in-
 fecter les simples du venin de leur puantes he-
 resies. Les criminels de leze Majesté humaine
 offensent principalement le Prince & estat, cō-
 tre lesquels ils s'estoient bandez: mais les here-
 tiques offensent principalement Dieu, contre
 lequel ils conspirent, & la majesté duquel ils
 offensent, luy desrobant la vraye gloire & hon-
 neur qui luy est deuë, & polluant sa religion, ils
 offensent aussi l'Eglise, laquelle ils tourmentent
 en la persecution de ses membres, & par leurs
 schismes & heresies deschirent sa sainte Vniō,
 & ne sont pas nets du crime de leze majesté
 humaine, par ce qu'il n'est possible que celuy
 qui est desloyal à Dieu, soit fidele aux hommes
 dont nous n'auons que trop grande experien-
 ce. Car depuis vingt six ans qu'ils ont commē-
 cé à croistre en France, ils se sont monstrez les
 plus grands traistres à leurs Princes & patrie,
 faisant guerre ouuerte contre tous les deux,
 qui oncques furent en France. Dont les practi-
 ques & embusches diuerfes qu'ils ont dressées
 contre les personnes des Roys, les villes par
 eux saisies contre leur autorité & comman-

dement, les deniers par eux leuez contre leur
 vouloir, & les intelligences & ligues eues &
 faictes avec des estrangers à leur desceu & des-
 auantage, seront foy à la posterité pour iamais.
 Il faut donc conclurre, que les heretiques sont
 les plus dangereux ennemis domestiques de
 tous, & par conséquent, il faut inferer, que la
 guerre faite contr'eux est plus necessaire, que
 autre guerre quelconque, soit elle domestique
 ou estrangere. Et pourtant, quand ils seroient
 les plus forts, & en plus grand nombre que les
 Catholiques en France, (comme ils ne sont pas,
 & ne seront iamais, s'il plaist à Dieu) il ne fau-
 droit pas pour cela laisser d'espouser la que-
 relle de Dieu & defendre son Eglise & religion
 contre leur tyrannie. Car nous sommes ailleu-
 rez par les saintes Escritures de son assistance
 & ayde contr'eux; & lisons comme il a fait vne
 poignée de fideles surmonté millions des infi-
 deles & apottats tels qu'ils sont. Gedeon en fa-
 çon estrange avec trois cens hommes seulemēt
 deffit plus de six vingts mille Madianites.
 Sanson par la vertu diuine tua mille Philistins
 avec la maschoire d'un asne. Et pour taire la
 force laquelle Dieu a donné aux femmes contre
 ses ennemis. Les victoires lesquelles Iudas
 Machabees & ses freres combattant pour la
 loy de Dieu contre les Idolatres qui les voulu-
 rent forcer, sont admirables, & quand n'auirois
 autre exemple quelconque, nous debuioient
 pousser à faire guerre contre l'heretique. Mais
 nous auōs encore d'autres exemples pour nous

Judicij cap. 8.

Judicij c. 15.

*Voyez le ch.
 3. & 4. du 1.
 liure des Ma-
 chabees avec
 les chapitres
 suiuants.*

inciter à vne si iuste defense & saincte entre-
prise. Car nous lisons comme Simon Mont-
fort Capitaine general de l'armee Catholique
contre les heretiques Albigeois de ce temps là,
auec huiet cens hommes seulement vainquit &
désfit quarante mille Albigeois, & tua le Roy
d'Arragon qui les aydoit & defendoit. Et pour
ne mettre en oubly les exploits de nos hereti-
ques modernes, depuis trente ans qu'ils ont fait
guerre contre l'Eglise en France, & au pais bas,
ils ont esté plusieurs fois battus & vaincus en
bataille rangée par les Catholiques, sans auoir
onques encore gaigné bataille sur eux. Et pour-
tant nous esperons en Dieu, que maintenant
n'estant pas si forts comme ils estoient lors, ils
n'auront plus grand auantage sur nous, pour
force que le malheureux tyran de Valois leur a
peu donner, en se rendant leur Chef, & se con-
stituant ennemy capital des Catholiques avec
eux.

Quant à la troisieme raison. Je confesse que toute guerre se doit faire & conduire par l'au-
thorité du Prince & Magistrat, & que c'estoit
vne des raisons pour lesquelles le peuple d'Is-
raël disoit à Samuel, qu'ils vouloient auoir vn
Roy comme auoient les autres nations, pour
marcher deuant eux, & pour batailler pour eux.
Et pourtant par le droit des Romains, tant s'en
faut, que lon puisse faire guerre sans l'autorité
du Prince, qu'il n'est permis de porter armes
sans sa licence & permission. Car le Prince est
constitué pour defendre le peuple de l'outrage

Responce à la

3.

1. Reg. 6. 8.

*Tit. ut arme
rū usus inscio
principe sit in
terdictus Et
autent. de ar-
me.*

& iniure des meschans, s'il ne peut par ses loix reprimer les larrecins, punir les adulteres, exterminer les impies, & consecutiuelement chasser les autres criminels, il luy faut auoir recours à la guerre pour dompter leur opiniastrété & rebellion. Mais si le Prince est absent lors qu'il est question de la defense du pais & du peuple, ou si estant present, il ne veut, ou ne peut defendre la querelle de Dieu & la patrie. Si au lieu de maintenir la vraye religion, & suivant son office Royal, exterminer toutes heresies avec les heretiques, & leurs complices & fauteurs, il n'en fait rien, ains les supporte & fauorise. Si au lieu de faire vne bonne & sainte guerre contr'eux, il pratique souz main le contraire, & de fait conuertit les deniers accordez & volontairement contribuez par le Clergé & peuple Catholique pour telle fin, à la manutention des heretiques, & subuersion de la Catholique religion. Si au lieu de chasser les heretiques hors du Royaume, de leur oster les villes & places fortes qu'ils tiennent contre sa majesté Royale, il tasche souz main de les planter au cœur du Royaume, les faire maistres des lieux importans, prenant en sa protection la ville de Geneue. Si au lieu de faire guerre au pretendu Roy de Nauarre heretique, relaps, & pour tel condamné par l'Eglise, & selon la requeste de nostre saint Pere le Pape, d'executer sa iuste sentence contre le malheureux Bernois, il la fauorizé plus que iamais, s'estant depuis ce temps-là confederé trespasroictement
avec

avec la Roync d'Angleterre, & les autres heretiques estrangers, & faisant secrettement donner au Biernois les deniers lesquels il auoit leuez sur les Catholiques pour l'exterminer avec tous les autres heretiques de la France. Si au lieu de chasser lesdits heretiques hors la Guyenne par la bonne conduite du valeureux Prince le Duc de Mayenne, en luy fournissant les deniers accordez & payez par le Clergé & peuple à ceste fin, il s'est tellement deporté en fausant sa parole, que le Duc apres auoir faict plusieurs exploicts, & regaigné plusieurs chasteaux & fortes places sur l'heretique, fut à son grand regret, & contre l'esperoir de tous bons Catholiques, faute d'argent, & d'autres choses necessaires pour la poursuite de son heureux commencement contrainct de se retirer. Bref, si au lieu d'exterminer & chasser les heretiques hors du Royaume de France, il appelle vne grande armee de leurs amis & freres en France pour les y defendre, supporter & maintenir, au lieu de conseruer les Catholiques, villes, bourgeois & habitans en la paisible iouissance de leur Catholique religion, il amene infinies troupes des heretiques, Reistres, Lansquenets & Suysses pour les molester, piller, saccager, & massacrer, en lieu de caresser, entretenir & stipendier des gensdarmes & bons soldats des deniers publics & amassez du peuple, pour combattre & chasser hors l'heretique, il les a fort mal traictez sans leur faire payer leurs gages, mais pour frustrer les bons subiets de l'esperance qu'ils auoient de

veoir l'ennemy vaincu sans aucune foule du
 pauvre laboureur & villageois, il a par ses pra-
 tiques secretes souz main fait tels deniers tom-
 ber entre les mains de l'heretique mesme, &
 par ainsi procuré la vexation & foule du pau-
 vre peuple plus que iamais. Au lieu de favori-
 zer, respecter & auancer les plus habiles & va-
 leureux Gentilshommes & Seigneurs Catholi-
 ques du Royaume, pour en la force de leurs
 bras combattre, vaincre & chasser l'heretique,
 d'une cruauté inouye & plus que barbare il a
 massacré le plus valeureux, debonnaire, sage &
 expérimenté Capitaine de son temps. Au lieu
 de reuerer & respecter son Clergé, Cardinaux,
 Euesques & autres Prelats, il a en pleine assem-
 blee de ses Estats deuant tout le monde cruelle-
 ment assassiné le Chef Pair & premier Prelat
 de son Royaume, Cardinal de l'Eglise Romaine,
 Legat du Pape, Archeuesque & pere des
 Rois de France. Au lieu de commander, comme
 Roy tres-Christien, & selon le serment de son
 sacre, l'extirpation de l'heresie en France, & de
 mettre en route tous heretiques, ennemis iurez
 de la vraye religion, il s'est rendu leur poltrot,
 en massacrant les enfans plus traistreusement &
 malheureusement beaucoup, que ne fait Pol-
 trot le pere. Au lieu de soulager, consoler & re-
 creer son peuple apres tant d'afflictions, angois-
 ses, foules, trauaux & faix, dont ils ont esté de si
 long temps trauaillez & presque accablez, il
 leur oste tout espoir de se veoir iamais en vn
 bon & seur repos de conscience & d'esprit sous

luy, par ses deportemens, de iour en iour plus pernicieux & execrables que iamais, & confirmatif de ce dont aucuns doutoient. Si le Prince donc, au lieu de faire son deuoir se seroit tant oublié, que de se monstrier plustost Tyran que Roy, heretique que Catholique, ennemy de la vraye religion, que propugnateur & defendeur, & ce en tant de façons, & par si manifestes presumption, comme il est demonsté, sans amener encore d'autres assez pregnantes, lesquelles pour euitier prolixité ie tais, la chose se manifestant plus & plus de iour en iour. Le laisse a penser, si le peuple Catholique aura transgressé les loix, pour en vne si grande & vrgente necessité de leur defése contre l'heretique, auoir prins les armes? En cas d'absence ou d'impuissance, le subiet n'est pas tenu d'attendre le retour ou commodité de son Prince, ains peut, voire doit faire son deuoir de se defendre & sa patrie contre l'incursion de l'ennemy. Et sera il defendu au peuple de se defendre contre l'ennemy heretique, quand le Prince ne veut rien faire, ains le laisse plustost prendre les places fortes, & luy dresse quasi vne eschelle pour monter aux plus grandes dignitez d'honneur au Royaume? Le vassal n'est pas tenu d'aider son Prince & Seigneur quand il sçait bien que la guerre par luy entreprise est iniuste. Et sera vn peuple Catholique tenu d'obeir, suiure & ayder celuy qui s'est allié avec les heretiques & les prend en protection contre l'Eglise de Dieu? Le vassal n'est pas obligé d'aider ou seruir son Seigneur

Tit. hic finitur lex. lib. feudat.

estant simplement excommunié, & sera vn peuple Catholique tenu d'obeir à luy qui est excommunié & censuré pour plusieurs grands crimes en diuerses sortes & manieres? Je sçay bien que les Rois & Princes, pour la plenitude de pouuoir qu'ils ont sur le peuple, ne sont pas tant subiets à rendre compte de leurs deportemens comme les autres, ains qu'ils doiuent estre supportez, bien qu'ils ne soient si gens de bien, comme leur office requiert. Mais si leurs deportemens sont si scandaleux, qu'on ne les puisse endurer, sans mettre tout en combustiō, si par leur mauuais reiglement l'Eglise & religion Catholique est trop interessee, lors tant s'en faut que ie sois tenu de conuiuer aux deportemens de mon Prince, que s'il est en mon pouuoir d'y mettre remede, ie luy doibs appertement resister, & mourir plustost que de uoloit consentir à telle impieté. Car tout ainsi cōme il y a grande difference entre la defense de l'iniure qui m'est presentement inferee, & la reparation de celle qui est desia passée & receüe, estant permist à vn chacun de se defendre contre la violence presente, & non de se venger par voye d'armes de celle qui est passée. Aussi il y a difference entre la guerre qui est faicte pour se defendre contre la violence & iniure de l'ennemy qui nous assaillit, & celle qui sera entreprise pour la reparation de l'iniure & outrage ia receu. Car iacoit que nous pouuons par droict & legitimement faire guerre pour obtenir reparation des iniures & dommages ia receuz &

passez, comme fait Abraham & autres au vieil
 Testament, si faut il ce neantmoins mesurer les
 forces & moyens que nous auôs de faire guer-
 re, & en comparant nos forces avec celles de
 l'ennemy, considerer en nous mesmes, s'il ne
 vaudroit mieux d'endurer les pertes & domma-
 ges ia de long temps receuz, que de hazarder
 temerairement le reste qui nous demeure en-
 core entre les mains. Mais si la guerre, dont il
 est question, ne contient en soy seulement la
 reparation des iniures passees, mais encore dé-
 fense contre vn violent outrage & iniure nou-
 uelle, laquelle nostre ennemy nous tasche faire,
 (côme est la guerre de l'heretique maintenât en
 Frâce) lors nous pouuons & deuons faire nostre
 deuoir d'empescher l'ennemy, qu'il ne puisse
 surprendre plus de nos villes & forteresses, ou
 en autre maniere quelcôque nous offenser, qui
 n'est que guerte defensue. Et pour autant que
 nous sommes bien assurez que Dieu mercy
 nos forces sont plus grandes que celles de l'é-
 nemy, il nous conuiendra aussi de le forcer par
 nos tresuistes armes de nous rendre ce qu'il
 nous detient. De sorte que veu le merite de no-
 stre querelle, & moyens que nous auôs de faire
 guerre à l'ennemy, nous n'auons nulle occasiõ
 de desesperer du bon succez d'vne si iuste guer-
 re, comme mesme quand il n'iroit que pour le
 recouurement & defense de nos biens mon-
 dains. Mais la guerre laquelle nous menons cõ-
 tient en soy vn sujet beaucoup plus noble &
 excellent. Car il n'est pas question de nos biens,

Genes. c. 14.

villes & forteresses seulement, & de ne tomber en la subiection de plus grands & barbares tyrans qui oncques furent, mais il s'agist de nostre religion foy & creance, laquelle l'heretique nous voudroit oster. Et quand il est question de la religion, la chance est bien tournée, & la speculation bien diuerse de celle qui se fait en guerre pour des biës & commoditez terrestres. Car quand il est question des biens terriens, il nous est permis d'en disposer à nostre discretiõ, les pouuant quitter, si nous voulons, & pour euitier quelque scandale qui en pourroit suivre, les deuons abandonner, & preferer en tel cas le joug d'un tyran & mauuais Prince à la conseruation des choses caduques & môdaines. Mais en matiere de religion, telle conuiuece n'est nullement permise, & tant s'en faut que l'on doie obeir a puissance que ce soit contre Dieu & son Eglise, que pour la defense d'icelle il n'est fait d'un zeile ardent exposer biens, vie & tout, sans estre trop scrupuleux examineurs, ou des moyens que nous auons, ou des forces de nos ennemis. Car Mathathias & ses enfans, nonobstant les forces du tyran Antiochus, auquel plusieurs Iuifs transgressans les loix de leurs maieurs, commençoient desia obeir, n'a iamais voulu escouter aux remonstrances faictes par le Tyran, ains frappé d'un vray zeile de sa religiõ, tua de sa main le Iuif qui en sa presence voulut sacrifier aux Idoles, sans espargner l'officier du Tyran mesme qui cõmandoit tel sacrifice, abattant quant & quant l'autel dressé pour telle fin.

Vide D. Tho.

l. 2. q. 96.

art. 4.

1. Machab. 2.

Ainsi feirent apres sa mort les enfans, lesquels
sans craindre la multitude de leurs ennemis, &
les forces du Tyran Antiochus, qui les perse-
cutoient, ont avec vne poignée des fideles vnies
avec eux defendu la querelle de Dieu, empor-
tant plusieurs grandes victoires sur leurs enne-
mis. Car la guerre est tousiours iuste contre les
idolâtres & heretiques, lesquels Dieu a coman-
dé d'estre tuez & massacrez, & a eu pour tres-
aggreable le massacre de telles gens, bien qu'il
fust executé par la main des Prestres, tesmoin ce
que fit Phinees, lorsque par le commandement
de Moysse vingt quatre mille furent tuez en vne
iournee, & ce que fit Elias, quand il comman-
doit occire quatre cens & cinquante faux Pro-
phetes. C'est pourquoy l'Eglise a tousiours de-
puis le temps que les Rois ont esté Chrestiens,
& ont espousé la querelle de Dieu, approuué
& authorisé la guerre contre les heretiques &
apostats de la vraye religion. Car pourquoy ne
contraindrait pas l'Eglise les perdus & meschâs
enfans de retourner au droit chemin, (dit mon-
sieur saint Augustin) puis qu'iceux enfans ont
contraint les autres à perir? C'est pourquoy la
cōstitutio imperialle approuuee par l'Eglise, or-
donne que tous heretiques, de quelque qualité,
conditio, nom & sexe qu'ils puissent estre, soiēt
perpetuellemēt infames, *diffidari atq; banniti*. En
ce qu'ils sont infames, la porte & entree à toutes
dignitez leur est fermee, en ce qu'ils sont *diffi-*
dari & banniti, ils sont hors de la protectio des
loix, & exposez à la punition d'vn chacun.

Numeri 25.

Reg. 3. c. 18.

*Augus. epist.
50. can. schis-
matici, 23. q.
6. anient. G.
24. c. de
heret.*

*Super. in
tractatu de
poteft. fecul.
super eccle-
fiast. perso.
reg. 1. 26.
& Cassan.
in comment.
cōfuetut. Bur
gund. tit. de
confiscatione
§. 1. in verbo,
qui confisque
le corp. 10.*

Car il est permis à vn chacun de les occire, sans aucune crainte de punition, la loy ordonnante & commandant de le faire. La loy donc Imperiale receüe, approuuee & confirmee par l'Eglise, permettant à vn chacun de faire guerre contre l'heretique, & de l'occire comme criminel de leze Majesté diuine, on ne se doit pas en cest endroit tant arrester au commandemēt du Roy pour faire telle guerre. Ains tout ainsi cōme vn Roy Catholique se doit sur tout employer à la guerre contre l'heretique, pour estre soldat de sa mere l'Eglise, & obligé de la defendre & maintenir contre tous ses ennemis. Aussi quand il n'y a point de Roy, ou quand le Roy est tel, qu'il vaudroit mieux de n'e auoir point, pour ce qu'il ne veut rien faire contre l'heretique, ains au contraire le fauorize & supporte. Le peuple Chrestien subiet à vn tel Prince n'est pas à cause de sa malignité, quitte de l'obligation, par laquelle il est tenu & trefestroitē mēt obligé à Dieu & à son. Eglise de maintenir & defendre la vraye religion, & de faire bonne guerre contre toute heresie & faulſe doctrine, tant qu'il luy sera possible, sans espargner sa vie. Car il est obligé à Dieu, en ce qu'il est hōme Chrestien, & non en ce qu'il est subiet à vn tel & tel Roy, & l'obligation dont il est tenu à Dieu est la plus ancienne & vallable, & ne peut estre effacee ny diminuee par celle qui le fait suiet au Roy, & pourtant demeurera-il tousiours obligé enuers Dieu, & luy doit obeir, quand ce seroit contre tous les Rois du mōde, choisissant

choiſſant toujours de preferer le ſupreme Magiſtrat en deu ordre d'obeiſſance, à tous ſubalternes & inferieurs officiers. Or ſi eſt-il que l'Egliſe denonce guerre à tous heretiques, comme à ſes plus pernicioſes & iurez ennemis, & exhorte vn chacun bon fidele à vne treſſaincte entrepriſe. Et tant ſ'en faut que ceux qui auront occis tels heretiques doiuent eſtre tenus pour homicides, que ſi bruſlans du zèle de leur mere l'Egliſe ils l'auront fait, ils n'en doiuent faire penitence quelconque. Car ceux qui ſe croiſent pour faire guerre contre les heretiques iouyſſent des meſmes indulgences que les croiſez contre les Turcs & infideles en la terre ſaincte. Il n'eſt pas donc au pouuoir du Roy comme Magiſtrat ſubalterne d'empeschiſer ſon ſubiet, ſelon droit, d'obeir à Dieu & à ſon Egliſe qui ſont les ſupremes & ſouuerains Magiſtrats. Et pourtant, ſi le Roy ou ne veut, ou ne peut combattre l'heretique, le ſubiet ayant la commodité & moyen de le faire y eſt tenu, & le doit faire, malgré ſon Prince, ſ'il ſera ſi peu Catholique de n'y vouloit pas conſentir, voire il le peut faire contre le Prince meſme, en deſendant la querelle de Dieu, ſi tel Prince le voudroit empeschiſer, ou contraindre à faire choſe contre ſa religion ancienne & receuë de ſes maieurs de main en main. Car autrement il nous faudroit cōtre toute l'Egliſe de Dieu blaſmer Mathathias & ſes enfans les Machabees, pour ſ'eſtre oppoſez à Antiochus & ſes ſucceſſeurs, en la manutentiō de la religiō & loix de Dieu, receuës & gardees

*Can. ex cōmunicatorū 23.
9.5.*

Conſiliū Lateranenſe in cap. ex cōmunicamus 1. §. Catholici, de heret.

de leurs maieurs de toute antiquité. Car ils n'auoient lors autre Roy que luy, & ce neâmoins pour la defense de leur religion ils n'ont fait nul scrupule de s'vnir ensemble, & prendre armes contre luy, & l'ont valeureusement combattu, & emporté plusieurs signalees victoires contre luy & les siens. Ce qu'ils n'eussent pas fait, au respect de la tyrannie qu'il vsurpoit sur eux, pour ce que Dieu, pour les pechez du peuple Iudaïque, a permis qu'ils endurassent par fois le ioug de Nabuchodonosor & autres Idolatres, quant à la seruitude personnelle des corps & biens, voulant qu'ils obtemperassent à tels Rois en cest endroit, sans permettre toutes fois qu'ils fleschissent en leur religion, ou embrassant l'idolatrie de tels Princes en façõ quelconque. Car les Iuifs, alors le peuple de Dieu, & les Chrestiens qui leur ont apres succedez en ceste prerogatiue, ont tousiours en cest endroit obserué la reigle de nostre Seigneur, en donnât aux Rois & Princes infideles tels droicts qui leur estoient deuz sur les corps & biens, & reseruant à Dieu ce qui luy appartenoit touchant les ames des siens. A plus forte raison dõc pouuoit on faire guerre en la defense de nostre religion Chrestienne, sans demâder congé à celuy, qui pour estre excommunié & depósé de son estat par les saincts Canons, n'estoit en façon que ce soit nostre Roy. Car en ce qu'il estoit excommunié pour le seul assassinat du Cardinal & Duc de Guise, sans me vouloir aidé des autres censures, esquelles il estoit enuélé,

tous les subiets & peuple de France estoient
tenus de le fuir & euitier pour tel, & n'estoient
pas tenus de luy faire seruice ou hōmage quel-
cōque si long tēpsqu'il estoit excōmunié, cōme
il est demonstré, & ce sans attendre declaration
quelconque estre faicte par le Pape, comme il
appert non seulement du decret du Concile de
Basle enregistřé en la pragmatique sanction, &
confirmé par l'autorité du Pape au Concile de
Latran souz Leon dixiesme, & aux concordats
du mesme Pape & de François premier Roy de
France, mais encore du decret que lon attribue
communement au Concile de Constance. Car
par le premier decret nous sommes tenus d'e-
uitier celuy qui notoirement aura contracté
la censure d'excommunication promulguee
par la sentence du droit, & par le second d'eui-
tier celuy qui notoirement aura fait violence sur
la personne d'un Prestre, sans attendre autre de-
claration quelconque du Pape ou autre en cest
endroit. Et en ce qu'il estoit aussi par le decret
du Concile general de Lion deposé, *ipso iure*, *In c. 1. de ho-*
c'est à dire, par la sentence du Canon mesme *micid. in 6.*
d'iceluy Concile, il n'estoit plus Roy, & pour-
tant l'obeissance & hommage que les François
deuoient à Henry de Valois comme à leur Roy
& Seigneur, ne luy estoit plus deu, n'estant plus
ny l'un ny l'autre, par l'expres decret dudit Co-
cile, lequel en vne telle notorité du fait, qu'est
l'assassinat par luy dernièrement cōmis à Blois,
ne demande nulle autre sentence d'excommu-
nication, ou deposition, ou diffidation contre

celuy qui aura commis l'assassinat; comme il appert de la fin du chapitre en ces paroles, *nulatenus alia excommunicationis, vel depositionis, seu diffidationis, aduersus eum sententia requiratur.* Lesquelles paroles il faut necessairement entendre d'une sentence declaratoire, & non d'une sentence condemnatoire, & ce pour deux raisons: La premiere est, par ce qu'un peu deuant au mesme chapitre, il est dit, que par la perpetration de l'assassinat il encourt, *ipso facto*, les sentences d'excommunication, & deposition de dignité, honneur, ordre, office & benefice, & que telle dignité, honneur, ordre, office & benefice puissent estre libremēt conferez aux autres, par ceux auxquels il appartient d'en disposer. Ce qui ne seroit nullement permis, si par la sentence du droit il n'estoit desia priué de telles choses. Car sans sentence de priuation telle dignité, honneur, ordre, office & benefice seroient encore à luy, & par consequent ne pourroient estre conferez à un autre sans sa volonté. Or estant desia par la sentence du droit excommunié & depose, nulle autre sentence d'excommunication ou deposition estoit necessaire, ains inutile & superflue cōtre celuy qui estoit ia tellemēt depose, que ses dignitez, honneurs & offices pouuoient estre librement conferez à un autre. D'où il s'ensuit, que les paroles finales du chapitre prealleguees, ne se doiuent pas entendre d'aucune sentence priuative ou condemnatoire qui n'est nullemēt requise, ains d'une sentence declaratoire qui seroit requise & vtile, au

cas qu'il n'apparoistroit du crime, mais ou il ap-
 pert euidemment du crime, le Concile dit que
 elle n'est pas requise, doctrine conforme au
 droit, comme demonstre copieusement & do-
 ctement avec Felin en ses commentaires sur le
 droit Canon. La seconde raison est fondee sur
 la nature & vertu de la sentence du droit, car
 ceste sentence a telle propriété, qu'elle est pro-
 molguee sans aucun ministere ou fonction du
 Iuge, par ce que la loy ou Canon note le fait en
 telle sorte, qu'il n'est pas requis que le Iuge s'é-
 tremette pour faire le transgresseur encourir la
 peine de son forfait, estant telle peine desia en-
 courüe, *ipso facto*, par la sentence du droit. Car la
 loy mesme prononce icy sentence en telle façõ,
 qu'il n'y a nul interval entre la sentēce & la pro-
 nonciation d'icelle, & n'impose seulement la
 peine, mais l'execute quant & quant. De sorte
 que les soldats qui sont priuez de leurs gaiges,
ipso facto, par la sentence du droit, ne les reçoir-
 uent pas licitement, & ce qu'ils auront reçeu,
 pourra estre licitement redemandé d'eux. Et ce
 n'a pas lieu seulement ou le crime de celuy qui
 est priué de ses biens ou autrement puny par la
 sentence du droit est manifeste & euident, mais
 aussi ou il est occulte, car tousiours est-il vray
 que deslors qu'il aura commis tel crime, il aura
 encouru la peine, *ipso facto*. Et pourtant si aucun
 auroit secrettement escrit ou prononcé quelque
 heresie, & par ainsi seroit heretique occulte, ia-
 goit qu'il soit estimé pour bon Catholique, &
 pour tel auroit paisiblement iouy de ses biens,

*In e. Rodul-
 phus, de res-
 cript.*

*Bart. ad l. i.
 ff. de his qui
 not. infra. Et
 Baldus in au-
 tent. habita,
 C. ne filius
 pro patre.*

*Bal. in l. si
 quis maior.
 C. de retr. fact.
 Et in l. ult.
 C. de locato.*

*Arg. l. com-
missa ff. de
publicant.*

*Cap. 2. de
prescript. in
6.*

*Cap. cum se-
cundū de he-
ret. in 6.*

*In d. cap. 1. de
homic. in 6.*

*In c. ult. de
heret.*

& apres la mort ses enfans ou autres de bonne foy auroient aussi iouy d'iceux pour aussi long temps. Ce neantmoins si apres la mort il sera descouvert auoir esté heretique, tels biens de son viuant desia confisque par la sentence du droit, & par ainli n'estant plus à luy leur seront ostez, si comme possesseurs de bonne foy ils ne les auront acquis par vne longue prescription de quarante ans. Nulle sentence, donc, cōdemnatoire ou priuatoire est requise contre celuy qui est desia condamné, priué & depose par la sentence du droit, & par consequent il faut entendre les mots prealleguez de la fin dudit chapitre, d'une sentence declaratoire, qui n'est pas requise, ou le crime est manifeste, comme il est demonstre. Car iacoit que declaration du crime semble estre necessaire auant que pouuoir executer la confiscation des biens d'un heretique, le crime duquel n'est pas assez manifeste. Ce nonobstant, ou le crime est euident, telle declaration n'est pas requise, selon l'opinion de plus doctes confirmee par le texre preallegué dudit Concile de Lion. Et pourtant ce n'est pas sans cause, que le Pape traictant del'obligation de vassal enuers son Seigneur heretique, decrete simplement que le vassal ou subiet est absouz & deliuré, *ipso facto*, de tout hommage, seruice, & fidelité iuree, si son Seigneur sera manifestement cheu en heresie. Par ces raisons, sans amener d'autres, il appert assez, qu'au cas de l'assassinat commis à Blois, nulle sentence declaratoire est requise, pour deliurer le peuple de France

de l'obeissance & hōmage lesquels ils deuoient
à Henry de Valois comme Roy de France. Car
l'assassinat par luy commis est tout notoire &
euident, & par consequent son excommunica-
tion, deposition & diffidation encouruës par la
sentence du droit ne demandent aucune decla-
ration, non seulement par ce que le texte mes-
me du Concile de Lion y est formel, comme il
est demonstré, mais aussi par ce qu'ou notorie-
té du fait est coniointe avec sentence priuative
du droit, elle porte quant & elle execution. Ce
qui est tout certain, ou par telle sentence du
droit, liberté & exemption est acquise à autrui,
[comme par la deposition de Henry de Valois
il aduint au peuple de France] selon la doctrine
du Bartole, qui porte qu'une sentence absolu-
toire tire quant & soy execution. De maniere
que la distincō d'aucuns qui confessent, qu'ou
la notoriété du fait est sans aucun doute, la sen-
tence du droit peut estre misen execution, mais
que ce neantmoins on n'est tenu à faire telle
execution si long temps que le iuge tolere le
censuré, ne declarant pas son crime, & par ainsi
notoriété du fait, disent ils, obtient bien l'effect
de sentence declaratoire, quant à la manifesta-
tion, mais non, quant à l'autorité. Ceste distin-
ction, dis-je, n'empesche pas ce que nous pre-
tendons. Car i'accorde bien qu'au cas que telle
deliurance & exemption de tout hommage &
fidelité deuë au Seigneur ou Prince concerne-
roit la seule faueur & commodité du sujet deli-
uré, telle distinction peut auoir lieu, par ce qu'il

*Bart. in l. me
tum. autent.
§. sed quod
prop. ff. quod
met. causa.*

*Caiet. ad q.
12. 2. 2.*

est permis à vn chacun de renoncer à ce qui est introduit par droit en sa faueur. Mais l'exemption d'obeissance acquise au vassal par l'excommunication & deposition de son Seigneur, ne concerne pas seulement la faueur du vassal, mais aussi la haine d'un tel Seigneur, qui est ainsi pour ses deportemens trop scandaleux censuré par l'Eglise. Et pourtant le vassal, quand il voudroit, ne doit & ne peut renôcer au droit d'exemption & deliurance qui luy est acquise par la censure de son Seigneur, s'il est en son pouuoir, sans plus grande scandale, d'abandonner & delaisser tel Seigneur. Car l'exception de excommunication & deposition dudit Seigneur acquise au vassal, ne concerne pas tant la faueur du vassal, que la detestation & haine du Seigneur, & pourtant doit estre repute exception odieuse, sans ce qu'il soit permis à personne de renoncer à icelle. Et c'est pourquoy les Canons permettent de proposer l'exception d'excommunication tousiours en chascue partie du procez, non seulement pour euirer le danger de l'ame, par communiqué avec l'excommunié, mais aussi pour faire plus craindre la censure, & pour mieux reprimer la faute de l'opiniastre & desobeissant. Ce n'est pas donc au pouuoir du vassal de renoncer au droit qui luy est acquis par l'excommunication & deposition de son Seigneur, par la sentence du droit. Et la dissimulation ou toleration du Prelat & superieur, tant s'en faut qu'elle scauroit empescher l'effect & vertu de la sentence du droit encouruë par le criminel,

*Bar. in l. qui
exceptionē ff.
de condit. iu
des & in l. si
filius, C. de
senat. Mace-
do. c. exceptio
nē de except.
Et c. i. eo. tit.
in 6.*

criminel, qu'elle ne dispense nullement en ce qui est contre la disposition de telle sentence. Mais au contraire, celui qui est condamné & depose par la sentence du droit, si le faict pour lequel il est depose est notoire & manifeste, ne est pas dit estre toleré, ains ses subiers le pourront abandonner sans attendre autre execution du Iuge par aucune sentence declaratoire. Et pourtant s'il est au pouuoir ou du vassal de refuser obeissance seruite à vn tel reprouné Seigneur, ou du superieur de faire executé la sentence du droit cōtre iceluy Seigneur, ny l'vn ny l'autre sera excusé, s'ils ne font leur deuoir. Je l'entend estre en leur pouuoir, quand sans aucun scandale des gens de bien, telle execution se peut faire. Comme si le Roy ou Prince censuré par l'Eglise est tellement hay & detesté de son peuple pour ses meschantez, qu'il n'est suiuy sinō d'un bien petit nombre, de sorte que le plus grand nombre du peuple en fuyant & detestant sa peruersité le peuuent facilement debouter de son Estat, suiuant l'autorité de l'Eglise. Mais s'ils n'auroient la commodité de ainsi faire, le Prince estant le plus fort, à cause de la multitude qui le suit, lors iacoit qu'ils demeurant tousiours libres & francs de route obeissance deuë à tel Prince. Ce neantmoins plustost que de s'exposer à la manifeste tyrannie & massacre de luy, ils le peuuent recognoistre pour leur Prince de fait, & luy obeir en choses externes qui ne repugnent directement avec le commandement de Dieu. Et ce quand tel Prince

*Panormis. Et
aliq in cap. 12
dudū de pra-
ben.*

*Cardinal. A
lex ad. in can.
prosto hac d.
ad hoc 32. est
in can. ma-
nifesta 1. q. 1.*

seroit declaré pour excommunié par le Pape, qui n'entend pas par sa declaration d'obliger les gens de bien à faire ce qu'ils voudroient s'il estoit en leur pouuoir, & ne le peuuent faire sans vn scandale trefeuident, par le manifeste danger auquel ils s'exposeroient comme nous voyons maintenant l'estat des Catholiques en Angleterre.

*Cap. ad vi-
tand. in fi. de
excomun. nō
vitand. in
cōcordatis in
ter Leonē 10
& Francisū
1.*

*Ioan. de Tur-
recr. in can.
Maximian⁹
23. q. 3.*

La patience donc & toleration du superieur ne profite iamais à celuy qui est censuré & condamné par l'Eglise, lequel demeure tousiours condamné & priué de son droit, & doit estre detesté de toutes gens de bien, tant que leur est possible, iacoit que quelquesfois elle excuse ceux qui communieront avec luy. Je dis quelques fois; Car elle n'est iamais approuuee quād elle est iniurieuse à Dieu & à tous bons Chrestiens. Or pourtant le tresdocte Cardinal Iean de Turrecrematu, dit, que la patience qui tend à l'iniure de Dieu & des fideles n'est pas louable, ains plustost vne coupable negligence, par ce qu'elle neglige d'euitier l'offense de Dieu. Que Mathathias est loué pour s'estre vaillamment leué contre les ennemis de la religion, & au contraire la simplicité des autres est blasmee, pour ne s'estre pas defendus contre ceux qui ont inuadé la foy, & que pour ceste cause on ne doit espargner les armes, où la defense de la foy & patrie est necessaire, craint que l'hōme ne semblast tenter Dieu s'il faisoit autrement. De ce nous pouuons assez marquer la grande prudence de nostre mere l'Eglise, en ordonnāt que

certains crimes fussent censurez par la sentence de ses Canons, sans attendre celle d'aucun Magistrat ou Iuge, pour par ce moien intimider les hommes & les destourner de la perperratiõ de tels forfaits. De faõ que ce n'est pas sans cause, que le Concile de Lion prealleguë ne demande autre sentence que celle du droit, ou l'assassinat est manifeste. Car la loy ou Canon parle tousiours, est sans toute acception des personnes tousiours equitable, ne punissant iamais autre que celuy qui est coupable, inexorable, & sans aucune perturbation. Mais l'homme n'est pas sans trouble, ne parle pas tousiours, ains se tait quelquesfois quand il doit parler, & ne peut pas tousiours parler quand il voudroit, à ceux auxquels il doit parler. Je sçay bien que la declaration du Magistrat est necessaire en chose douteuse, & qu'en matiere difficile Dieu reserue pouuoir de declarer à son grand Prestre. Je sçay aussi bien que nostre saint Pere le Pape par declaration des censures encouruës par Henry de Valois, y pourroit adiouster quelque chose, & aggrauer lesdites censures selon sa contumace, deffendant quant & quant à tous Rois & Princes Chresties de le recognoistre plus pour Roy ou de contracter plus d'alliance avec luy, suiuant la forme de la sentence declaratoire de Clemër cinquieme, contre Andronicus Paleologus lors se disant Empereur des Grecs. Et ie n'ignore pas que la decretale constitution, qui requiert declaration estre fait sur l'heresie, auant que les biens de l'heretique puissent estre occupez, ne

Deuter. 17.

*Cap. cum se-
cundū, in fin.
de heret. in 6.*

dit pas que telle declaration doit estre faicte par le Pape, ains se contente de celle qui sera faicte par l'Euesque du lieu ou par quelque autre p[er]sonne Ecclesiastique ayant pouuoir en tel endroit. Mais que le peule de France n'estoit pas deliur[é] & quitté de toute obedi[en]ce & seruice, lequel Henry de Valois scauroit pretendre sur eux, deuant toute declaration faicte par le Pape, & que par consequent ils n'ont à trespas cause[re] tousiours depuis le massacre commis à Blois, refusé tout h[om]mage & seruice audit Henry, ie le nie tout à plat, par les raisons prealleguees. Et quād les priuileges pretenduz appartenir à la couronne de France que les Roys ne peuuent estre excommuniez ou declarez excōmuniez par autre Prelat que par le Pape luy-mesme, fussent veritables & approuuez, encore n'auront pas les Catholiques vn[s] de la France enfreint tels priuileges Royaux. Car c'est par les Canons & constitutiōs des Papes que nous disons ledit Henry estre censuré en tant de façons, & non par la sentence de quelque Euesque ou Archeuesque de Frāce ou d'autre païs. Et la sentence promolguee par la constitution du Pape, n'est pas de moindre forcée que celle qui est prononcee par sa bouche, selon la doctrine du docte Accurse & du grand praticien Guido Pape. Toutes ces circonstances bien cōsiderees, on ne doit pas trouuer estrange si nostre saint Pere ne se haste pas tousiours de faire declaration des censures notoirement encourues par la sentence du droit. Car telle declara-

*Accurs. in l.
cū quasi, §. si
plures, ff. de
fidei cōm. li-
bert. & Gui-
do Papa.
sing. 319.*

tion n'est pas grandement requise, sinon ou le fait est douteux, pour mieux supplier au defect de l'exécution, laquelle la sentence de droit accompagnée d'un fait notoire apporte quant & soy si le peuple & Clergé font leur deuoir. Et pourtant telle declaration ne constitue rien de nouveau, ains esclaireit seulement ce qui est desia constitué, estant ce qui estoit douteux en la disposition precedente. Et c'est que nous disons vne constitution declaratoire estre titee à ce qui est desia passé, & à ce qui est en suspens, par ce que telle constitution a esté desia auparavant promolgnée, iacq̃oit qu'elle n'a pas esté bien entendue. Et quant à moy i'ay tousiours esté d'opinion, que plusieurs qui depuis le massacre commis à Blois ont fait semblant de se vouloir gouverner selon la declaratiō, laquelle ils ont tant desirée estre faicte sur l'excommunication du feu Tyran n'en feroient pas si grand cas, ains demonstreroient plustost du fait quād l'excommunicatiō seroit à leur souhait publicce, que tout ce qu'ils protestoient n'estoit que caquet pour gagner du tēps à leur pretendu Roy, pour brasser des menées pernicieuses, desquelles il s'aduisoit de iour à autre pour affliger les meilleurs Catholiques & plus gens de bien de la France, qui s'estoient desia à tresuile cause soustraits du ioug insupportable de sa tyrannie, raschant les rendre esclaves en fin à l'heresie, comme a peu veoir tout le mode. Car puis que ce bon hermite de Roy a fait si peu de cas de la requeste de nostre saint Pere (le priant de vou-

*Collectanis
in c. quonia
de simonia.*

loir, suivant le deuoir d'un Roy tres-Chrestien & le serment fait à son sacre faire executer sa sentence declaratoire en France contre Henry de Bourbon se disant Roy de Nauarre) comme de n'en faire rien, ains souz main, selon l'aduis de Belloy & ses complices, deffendre expressement que telle declaration ne fust publiee à Paris n'ailleurs. Quelle reuerence deuoit il porter [à vostre aduis] à la declaration qui seroit faite par le mesme Pape contre luy mesme? Pensez vous que Belloy, qui en la conclusion de son meschant liure contre la Bulle du Pape, donna conseil audit Roy de ne permettre nullement que ladite Bulle fust publiee contre celuy de Nauarre, pour ce que telle publication (dit Belloy au Roy) vous touche particulierement, d'autant que le Pape apres auoir gaigné ce pied que son rescript soit receu par vostre conuiuece, il s'attaquera bien tost plus hardiment à vostre personne pour le moindre suiet de mescontentement qu'il s'imaginera, il vous excommuniera, &c. Pensez vous, dis-je, que Belloy & ses semblables qui ont osé donner ce conseil pernicieux au Roy Henry de Valois en faueur du Roy de Nauarre, faindroiét de le renouueller en faueur de luy-mesme? Ou que luy qui creut si tost leur conseil, de paour qu'il eut à cause de sa conscience nauree, que le Pape ne tentast quelque chose contre luy, feroit aucune conscience de se bander contre la Bulle mesme qui le touchoit en personne? De peu de cas qu'il feit en son viuant de ladite Bulle, nous pouuons assez coniecturer

la reuerence & authorité qu'il attribuoit à icel-
 le, & il ne faut pas douter que maintenant apres
 sa mort les heretiques & leurs associez ne facēt
 bruire par tout leurs vieilles calomnies contre
 les Bulles du Pape, luy deniant toute authorité
 sur les Rois & Princes, non seulement contre
 l'expresse authorité de l'Escripture sainte, mais
 encore contre celle de toute l'Eglise, confirmee
 par l'opinion commune de toute l'eschelle Ca-
 tholique de la sainte Theologie, & par vne
 practique & obseruation perpetuelle de tout
 temps. Car attendu que les Rois & Princes en-
 dommagent plus la Republique par leur mau-
 uais exemple, que par le peché mesme qu'ils
 commettent, [comme dit tresbien Ciceron] on
 ne doit pas trouuer estrāge, si le Pape, comme le
 souverain Pontife & Prestre en l'Eglise Chre-
 stiēne, excommunie & depose les Rois & Prin-
 ces pour leur deportemens scandaleux, plustost
 que les autres de moindre qualité, comme tient
 fort bien le doctre Faber ancien Iuriconsulte
 François en plusieurs endroits de ses commen-
 taires. Je dis le conseil que Belloy donna à Hen-
 ry de Valois, qu'il empeschast la publication de
 la Bulle du Pape contre le pretendu Roy de Na-
 uarre, auoir esté pernicieux, non seulement pour
 le mespris & contemnement qu'il contient de
 l'authorité de l'Eglise, mais aussi pour auoir esté
 l'occasion quasi de toute la calamité & misere
 qui est depuis aduenue en France. Car si ledit
 de Valois comme Prince Catholique & obeis-
 sant fils de sa mere l'Eglise eust executé telle

*Lib 3. de le-
gibus.*

*Faber art. 51
C. de summa
Trinitate, &
art. 5. sed &
quod principi
de iure natu.
gent. iustit.*

sentence contre l'heretique Biernois, il eust satisfait au desir du peuple & Seigneur Catholiques de son Royaume, il n'eust pratiqué chose au desaduantage de la Catholique religion, & n'eust onques songé au massacre detestable commis à Blois, pour lequel & autres ses deportemens malheureux il s'est depuis trouué en vn si miserable estat, & en fin s'est pourchassé vne mort si trespitoyable & estrange, que chacun peut veoir que ses deportemens ont esté fort desplaisant à Dieu, qui en a prit vne telle vengeance.

*Responce à la
4. raison.*

La quatriesme raison (car i'ay esté vn peu long en ma respōce à la troiesme) n'empesche en rien nostre guerre. Car bien que la guerre doit estre euitee sur tout, & qu'une inique paix doit estre preferee à vne iuste guerre, pour les hazards & dangers que la guerre apporte quāt & soy, si est-il neantmoins, que telle paix, iacoit qu'elle soit inique, à cause des pertes & dommages que plusieurs endurent particulièrement en leurs biens terriens, elle doit estre Chrestienne & raisonnable, sans apporter aucun detrimēt aux biens de l'ame. Car il n'y a nulle paix qu'en Iesus Christ, nul repos hors du giron de son Eglise. De sorte que de souhaitter vne paix mondaine en vne paisible iouissance de nos biens & aises, n'est pas tousiours le plus seur & meilleur souhait. Et de la desirer & preferer à la paix Chrestienne & repos de nos consciēces en vne & seule vraye Catholique religion, sent son Epicuriē, & est du tout esloigné de la profession Chrestienne.

Chrestienne. Et pourtant, tout ainsi cōme nous pouuons bien & legitimemēt faire guerre pour la defense de nos biens & patrie, & contraindre aussi l'ennemy de nous faire reparation de ce qu'il nous auroit desia rauy, si nos forces soient bastantes, [cōme elles sont, grace à Dieu, maintenant contre l'heretique & ses fauteurs] sans craindre l'euenement de la guerre, nous consolans de la iustice de nostre querelle, & confians de l'aide de Dieu. Aussi à plus forte raison deuons nous faire guerre pour la defense de nostre religion Catholique, & d'un vray zeile combattre l'ennemy de Dieu, sans nous arrester tant à la grandeur de nos forces. Car en tel cas, Dieu est tousiours pour les adorateurs, & avec petites forces, leur donnera vne heureuse victoire contre ses ennemis. Ainsi feit il à Gedeon, Samson & aux Machabees en l'ancienne loy. Et ainsi a il tousiours fait aux Catholiques contre les heretiques en nostre loy nouuelle, comme nous auons experimenté & experimentōs tous les iours, Dieu non seulement combatant pour nous, mais encore nous rendant beaucoup plus forts que nostre ennemy. Et si nous iettons arrier cest zeile en la querelle de Dieu, & au lieu de faire guerre à l'heretique son ennemy iuré, voulōs croupir souz son ioug, nous promettāt la iouissance de nos biens par le danger de nos ames, nous nous trouuerons en fin bien trompez, & perdrons biens, vie & tout. En Angleterre, quand la Roine Iesabel contre le sermēt iuré à son sacre, eut commencē d'abolir la Messe &

Religion Catholique, vn bon nombre des Seigneurs & Nobles du pais y voulurent resister de fait, comme ils auoient desia de bouche, ne voulant iamais consentir en pleine assemblee des Estats à vne si impieue ordonnance. Mais les autres en plus grand nōbre ne leur vouloiēt pas assister en vne si bonne entreprise, les vns pour ne vouloir encourir la malueillance de la putain fine & rusée, qui leur auoit promis montaignes d'or pour cōtinuer ses loyaux seruiteurs, les autres pour estre trop scrupuleux, estimant par ignorance bien lourde, que Iesabel femme heretique estoit leur Princesse legitime, & pour tant s'assurant d'vne pretendue clemēce de l'heretique, ils ne vouloiēt rien tenter cōtre elle. Par ceste malheureuse obeissance, ils ont laissé estably l'heresie en Angleterre, laquelle ils eussent sans faute, ou retranchée, ou pour le moins fort debilitée, si d'un zeile ils se fussent mis en armes pour venger la querelle de Dieu. Et tāt s'en faut qu'ils ayent iouy du fruit de leur espoir, que ceux-là mesmes qui estoient les plus grāds Seigneurs se sont trouuez les plus trōpez, exposez à la moquerie & disgrace de leur maistresse, qui les fait comme esclauē de ses mignons, gens de basse condition & infames par elle aduancez, & en fin les a fait finir leur iours ignominieusement au grand detrimēt & deshonneur de leur maisons. Et les autres en recompense de leur indeuee obeissance, & de la douceur dont ils se fioient, se sont trouuez depuis, & se trouuent encore ceux qui sont en vie bien loin de leur attente, &

au lieu de n'estre pas recerchez pour leur conscience (car ainsi leur estoit-il promis) ils sont emprisonnez en conscience d'heretique, pillez, saccagez & cruellemēt persecutez & meurttris, sans auoir aucun moyen maintenāt de se deliurer de la tyrannie, ou de restituer la religion Catholique au pais, laquelle ils ont par leur couardise, nonchalance & pusilanimite laisse chasser hors. Ce qui doit seruir maintenant d'exēple aux Seigneurs & nobles Catholiques de la Frâce, qu'ils se donnent bien garde de ne croire pas aux belles promesses des heretiques & de leur associez, & qu'ils ne laissent iamais l'heretique ouuert de Biene le codané & deshabilité par l'Eglise eniamber sur eux; mais que de bonne heure ils se conioignent & vinssent avec les meilleurs Catholiques & villes de la France, pour avec eux se defendre & maintenir en la vraye religion de leurs maieurs cōtre tous heretiques & leurs associez, s'assurant que ceux-là qui d'une perfidie tresgrande ont fausé la foy à Dieu, ne scauroiēt iamais estre loyaux à l'homme.

La derniere raison sent son Arhee, & est assez conforme à la creāce de nos Politiques modernes. Car de dire que la guerre ne se doit faire pour la defense de la vraye religion est doctrine faulse, pernicieuse, & repugnante à la parole de Dieu, qui sur tout a voulu que son peuple Iudaïque combattist pour la manutention de la religion contre les nations idolatres. De sorte que ne lisons d'autre guerre quasi au vieil Testament, que de celle que les Israēlites firent aux

*Respoſe à la
5. raison.*

Moabites, Ammonites, Philistins & autres Payens, & que les Machabees ont eu contre Antiochus & ses semblables, pour la manutention de leur religion. Et de s'affier tant sur la cōstance & stabilité de la religion Catholique plantee en France, comme de laisser l'heretique empiter sur nous, sans luy faire aucune resistance, outre ce que l'experience nous fait veoir comme vne infinité de nos freres, (qui du commencement estoient aussi bōs Catholiques que nous) a esté deprauee & infectee par la ruze & conuersatiō del'heretique, ce seroit nous faire plus sages que Dieu, & par mespris de son cōmandemēt le tenter merueilleusemēt. Car Dieu preuoyant la finesse de Sathan, & la balançant avec l'imbecillité de l'homme, a commāde à son peuple iadis, qu'ils ne fissent ny contractassent alliance quelconque avec l'estranger idolatre, de pœur que par conuerser avec luy ils ne tombassent en idolatrie, & le delaissassent comme luy. Et quāt aux heretiques, nostre Seigneur & ses Apostres nous cōmandent encōre plus particulierement de nous engarder de tels faux Prophetes, pour ce qu'ils sont d'autant plus dangereux que les Ethniques & infideles, qu'ils nous assaillent vestus en brebis, c'est à dire cōme Chrestiens, & avec la parole de Iesus Christ mal entendue & deprauee à leur fantasie, ils nous taschent deuorer de leur dent des loups. Laisser donc l'heretique empier sur nous, & de ne craindre pas le venin de son heresie, c'est de mespriser le cōmandement de Dieu, & nous penser plus sages

Deuter. 7.

Matth. 7.

1. ad Timot.

ult. ad. tit.

3. & Ioan.

n sua Ca-

belica.

que luy. Qui par expres nous defend telle con-
 uersatiō avec tous heretiques, de pœur qu'ils ne
 nous gastent & infectent de leur heresie & per-
 nicieux langage. Et quād nous serions asseurez
 (cōme ne scaurions iamais estre) de ne pouuoir
 estre endommagez par eux, & que se contentās
 de l'exercice de leurs heresies ils nous vou-
 droient laisser paisiblement iouyr de nostre re-
 ligiō Catholique, (chose repugnante avec le na-
 turel de l'heretique, ou il deuiet le plus fort)
 encore n'est-ce pas assez pour nous. Car par to-
 lerer son heresie, nous consentons aucunement
 au mal qu'il fait aux autres, & au deshonneur
 qu'il fait à Dieu, le laissant persister en sa malice,
 au detrimēt & de sa propre ame, & de celles de
 ses voisins. Attēdu que Dieu ne l'a pas iugé as-
 sez d'auoir defendu à son peuple de ne contra-
 cter nulle alliāce avec les idolatres, craincte que
 les fideles ne fussent seduits & corrompus de
 l'infidelitē des Payens, sans aussi adiouter qu'ils
 ne deussent auoir nulle cōpassiō de telles gens,
 ains qu'ils demolissent leur autels, brisassēt leur
 idoles, coupassent leur bois, & brussassent tout
 ce qu'ils auroient taillé & graué. Il ne faut pas
 donc nous exposer à la misericorde de l'hereti-
 que, qui est d'autant plus damnable que l'idola-
 stre, que l'idolastre demeure tousiours en son
 erreur, sans s'estre iamais enregistré au giron de
 nostre mere l'Eglise. Mais l'heretique par auoir
 abandonné l'Eglise, s'est rédu perfide & rebelle,
 & pour sa rebellion est subiet aux peines Eccle-
 siastiques & ciuiles constituees à l'encontre de

Deuter. 7.

*Opiniōs ab-
surdes et per-
nicieuses des
Politiques.*

tels apostats cōme luy. Car de dire que l'heresie ne doit pas estre chastiee par punition corporelle, pource que l'opinion cōsiste en l'esprit, & ne se peut assubiettir à la force & courage du corps, & que tant plus que nous courons sus & traueillons l'opiniastreté heretique, plus elle croist & s'eforcist, au lieu que si nous la mesprisions & remettions au iugement de Dieu elle se perdrait & esuanuiroit de soy mesme, c'est vne doctrine non moins faulse que pernicieuse, mise en auant par les heretiques & leurs amis les Politiques modernes, à ceste fin que l'heresie croissant de iour à autre parmy nous soyons plustost accablez par les forces des heretiques nos ennemis iurez, que n'ayons aucun moyen de nous mettre en defense contre leurs embusches. Car par ceste doctrine, il faudroit necessairemēt censurer la pluspart de la Bible, où il est parlé de la tresseure & aspre punition que Dieu a cōmandé faire par Moïse, Iosué, Samuel & autres, sur les idolatres schismatiques & apostats. Il faudroit blasmer le Prophete Elie pour auoir fait occire 400. faux Prophetes à vn coup. Pour ce que ce n'estoit qu'une opiniō de quelque faulse religion que ces gens là auoient imbuë, & en ce plus tolerable que l'heresie: Que les idolastres auoient receu telle doctrine de leur maieurs de pere en fils, sans s'estre onques enrollez au liste de la vraye religion, comme ont esté autresfois les heretiques, auant que tōber en leur heresie, comme ie disois tātost. Il faut aussi [suiuāt ceste meschāte doctrine] blasmer nostre Seigneur &

les Apostres, en ce qu'ils nous cōmandent si soigneusement d'euitier & fuir tous heretiques, les tenant pour excommuniez & execrables. Bref, s'il ne nous falloit que mespriser l'heresie, en la remettant seulement au iugemēt de Dieu, il faut effacer toutes les loix Imperialles & ordonnances des Princes tres-Chresties, qui ont tāt puny toutes sortes d'heretiques. Il nous faut abroger tous les Conciles generaux & escrits des saincts Peres, qui nous commandent de les debouter de leur charge, & de ne laisser telles gēs demeurer en reputation en l'Eglise de Dieu. Car les saincts Peres auouent cōme chose trespertinence, que l'vnique moyen de venir au bout des heretiques, estoit de les chastier par les loix & ordonnances des Princes. Monsieur S. Augustin confesse que la seule execution d'vne loy imperialle contre les heretiques de sa propre ville Cathedralle d'Hippon, fit plus de fruiēt en peu de iours, qu'il ne sceut faire luy mesme par plusieurs annees en leur preschant l'absurditē de leur erreur. Et le S. Pere Hierosime afferme constāmēt, qu'il faut retrācher & couper la chaire pourrie, pour guerir la playe, & que l'heresie d'Arrius ne print tel accroissement en l'Asie par autre occasion, que par ce que du commencement l'erreur (qui n'estoit au commencement que cōme vne estincelle) ne fut tout subit esteinct. Et si le Politique me viēdra dire, que l'heresie des Albigeois n'a pas esté esteincte ny abolie par les armes de Simon Comte de Montfort, ains plustost supprimée pour quelque temps demeurant here-

*Can. refecā
des 24. q. 3.*

ditaire en l'esprit de plusieurs, iusqu'à ce qu'elle
s'est remise sus, trouuant pour le iourd'huy vn si
grand nombre des propugnateurs qu'ils se pé-
sent assez forts pour desmesler leur querelle en
champ de bataille. Je luy respons, que pleust à
Dieu que l'heresie de Calvin fust en telle sorte
esteindre aujourd'huy par toute la France, cōme
par les armes du Comte de Montfort fut pour
lors celle des Albigeois chassée de la Guiēne &
Languedoc, & considéré que sont les armes
dudit Comte & autres Catholiques, toutes les
exhortations de saint Dominique & plusieurs
autres saints & doctes personnages n'estoient
bastantes pour supprimer telle heresie lors en la
Gaule Narbônoise. Il nous faut croire que tou-
tes les predications & exhortations du monde
ne suffiront pour supprimer le Calvinisme semé
maintenant par toute la France, sans le trancher
de l'espee. Et si pour le iourd'huy nous voyons,
à nostre grād regret, l'heresie des Albigeois re-
nouuēllée par nos heretiques modernes, ne de-
uons imputer celle à autre cause, qu'à la negli-
gēce du Magistrat, qui n'a pas tiré le glaiue ainsi
comme il appartenoit, pour la deuē execution
des loix & Canons contre les heretiques quād
ils commencerent leuer les cornes souz les re-
gnes des Rois precedens. Car tout ainsi cōme
la negligence de n'esteindre l'estincelle du feu
allumé par Arrius iadis en Asie, fut cause que la
flamme apres mit tout quasi en combustion.
Aussi sont les escriuains mesmes qui ont basty
leurshistoires en faueur desheretiques de nostre
temps,

*Papelinere li
re r. de l'hi-
toire de
France.*

temps, contraincts de confesser, que leur belle reformation empeschée de croistre par le soigneux deuoir des Euesques & Iusticiers ne se pouuoit estendre si auât par le passé, qu'auourd'huy, que tous estats seulement curieux de leur plaisir, ou profit particulier, ont eux-mesmes donné entree à ce dōt ils se plaignent le plus & se doutoient le moins. Si donc c'est par la negligence du Magistrat que l'heresie s'est tant aduancee, il faudra vser d'une tresgrande diligence pour la destruire, & ce que l'Eglise ne peut faire par douceur & par voye de remonstrance, il faut que le Magistrat le face pour la terreur de son glauiue materiel, lequel il doit employer en cest endroit à l'instance de l'Eglise, selon la doctrine de monsieur S. Bernard. Et quant à nous autres *Epist. 256.* Catholiques, qui auons ia par trop experimeté la douceur de l'heretique, & regrettons beaucoup l'experience que nous en voions faire nos voisins Catholiques, plustost que nous laisser tomber en vn tel inconuenient; il nous faudra exposer corps, biens, & tout ce que nous auons en ce monde. Car ce n'est pas en petite chose, que nous differons d'auec les heretiques, ains il s'agit de nostre creance, & de l'autorité, pouoir & obeissance deuë à nostre mere l'Eglise, l'vnité de laquelle ils deschirent & contemnent son autorité. Et de dire qu'il ne chaut par quelle prudence l'on cherche la vérité, & qu'on n'y peut paruenir par vn mesme chemin, sent trop son Payen, ou plustost Athee, & a esté à bon droit blasimé par S. Ambroise, & Prudentius en Sym-

machus Preuost de la ville de Rome, lequel
 pour mieux induire l'Empeur Valentinian le
 2.^a a tolerer l'idolatrie des Payens, entre autres
 raisons amena ceste icy. Car nous n'auōs qu'un
 mesme chemin, à sçauoir Iesus Christ, lequel
 nous embrassons en nostre baptême en l'vnité
 de nostre mere l'Eglise, pour paruenir à la verité
 & beatitude eternelle, laquelle il nous a pour-
 chassée au prix de son sang. Et hors ceste vnité
 Catholique ne feront que vaguer, courant çà
 & là, sans pouuoir iamais trouuer la verité, à sça-
 uoir nostre Sauueur au ciel. Pour la manutentiō
 donc de ceste vnité qui nous est si tresnecessai-
 re, il nous faut nous vnir Catholiquement en-
 semble. Il ne faut espargner ny biens ny moyēs
 en vne si sainte & iuste querelle. Car si en vne
 guerre entreprise, par nostre Prince contre vn
 autre Prince son voisin, lequel il dira auoir vsur-
 pé sur luy, nous ne faisons nulle difficulté de
 nous exposer corps, biens & tout, le iugeant vn
 acte treshonorable de nous y employer. A plus
 forte raison deuons nous estre prompts à nous
 employer en ceste guerre maintenāt entreprise
 par tous les bons & zelez Catholiques, & plus
 gens de bien de toute la France, pour la manu-
 tentiō de nostre religion. Car la guerre faite par
 le Prince contre vn autre Prince ou peuple n'est
 pas tousiours iuste, ains legerement & pour biē
 peu de chose, sans aucune iuste occasiō, est bien
 souuent commencee. Mais ceste guerre est tref-
 iuste en toute euidēce, & se mene pour la defen-
 se de la vraye religion & loix de nos maieurs en
 France, pour nos biens, femmes, enfans & mai-

sons, contre les ennemis de Dieu les heretiques & leurs fauteurs. Car outre l'extermination de la vraye Catholique & Apostolique religiō, ce qui nous auiedroit sans faute, si ceste sainte & neccessaire guerre ne la nous conserue, nous ne scaurions attendre que tyrannie, saccagemēs & toute desolation, si les heretiques (ia à Dieu ne plaie) deuinsent les plus forts, & eussent pour Roy le Biarnoïs, ou quelque autre à leur deuotion, tesmoin l'Angleterre, l'Escoffe & autres païs, ou les heretiques commandent. La guerre entreprise par le Roy ou Prince, pour n'estre pas tousiours iuste, n'oblige pas tousiours le subjer de luy tenir la main. Mais ceste guerre Catholique pour la religion, ne scauroit estre que iuste, & par consequent oblige tousiours le subjer d'y donner assistance selon les moyens. Et tant s'en faut, quē le peuple Catholique doit obeir au Roy ou Prince qui fait guerre contre la Catholique religion, qu'ils doiuent plustost endurer mille morts refusans tout à plat d'obeir à celuy qui leur commandera chose si iniuste. Ainsi firent le peuple Catholique quand Iulian l'Apostat leur commanda de cōbattre les Chrestiens. Et à plus forte raison doiuent tous Catholiques faire la pareille maintenant, quand tous heretiques & leurs fauteurs, defendeurs & alliez sont plus estroictement & particulierement cōdamnez & censurez par l'Eglise qu'ils n'estoient pas encore du tēps de Iulian. Ceste guerre n'est pas entreprise cōtre nostre Roy, (car les Catholiques ne sont pas accoustumez de faire telle chose)

52
mais contre celuy, qui d'un Roy tres-Chrestien
qu'il deuoit estre, deuint le plus pernicious tyrā
& perfide hypocrite que fut iamais. Et pour au-
tant que les saincts Canons de nostre mere l'E-
glise, pour ses maintes enormitez & excez into-
lerables l'auoient de long temps censuré, & de-
priué de tout le pouuoir & autorité qu'il eut
iamais sur le peuple François. Il ne sçauoit qu'à
tort le blasmer pour luy auoir refusé l'obediēce,
dont ils sont par ses crimes quittes, & de son au-
thorité & consentemēt propre desobligez. Car
si le peuple seul, ou tous ensemble, ou la meil-
leure & plus saine partie du royaume peut pour
des causes raisonnables & tendans à la cōserua-
tion de leur estat, deposer leur Roy, & establir
vn autre en sa place, personne de bon & sain iu-
gement ne me sçauoit nier, que l'Eglise en son
chef le Vicaire de nostre Seigneur icy en terre
ne puisse pour des occasions, qui toucheront la
manutention & entretenement de la vraye reli-
gion faire la pareille, deboutāt de leurs charges
tous ceux qui donneront empeschemēt à icelle
religion, & encore plus tels, qui par leur conui-
uence & autorité aduanceront heresie & faulse
doctrīne au detrimēt tresgrand de l'Eglise, &
dommage tresuidēt de sa vraye Catholique &
Apostolique religion. D'où il s'ensuit, que l'on
ne puisse qu'à grand tort blasmer les Catholi-
ques vnis maintenant en France, pour ce qu'ils
ont fait à l'endroit de leur feu pretēdu Roy Hé-
ry de Valois. Car ils ont tant enduré qu'ils pou-
uoient, & plus qu'ils ne deuoient en son admi-
nistration tyrannique, touchāt leur particulier,

supportans en patience vne infinité des oppres-
sions & iniures faites souz son autorité & par
son cōmandement. Mais il est maintenant que-
stion de la defense & establissement de la reli-
gion de Dieu, & des iniures faites à son saint
nom & Eglise. Et pourtant ils ne doiuent, &
quand ils voudroient ne peuuent dissimuler vne
si tresgrande iniure, sans encourir & le nom & la
peine d'une perfidie & trahison enuers Dieu. Et
la Noblesse Catholique de France se doit aussi
resoudre, & ne se laisser plus piper par des pa-
roles mensongeres & pernicieuses d'aucuns Poli-
tiques, qui ont presché autrement en faueur du
Tyran, ains suivant l'anciēne façon de leurs ma-
ieurs Catholiques & bons Chrestiens, ils doiuent
preferer la querelle de Dieu à toute affection
channelle. Il leur faut se souuenir que les François
ne sont pas accoustumez de maintenir vn Roy
perfide, hypocrite, ex cōmunié, & manifeste pro-
tecteur des heretiques, & qu'ils ont griefuement
offensé Dieu de ce qu'ils ont desia faict en cest
endroit. Mais que c'est le naturel de vray François
de desauouer pour leurs Rois, tous faineants
& de chasser de la royauté cōme bastards aliē-
nez de la vraye race des Rois tres-Chrestiens
tous hypocrites & ennemis de la vraye religiō,
pour cōbattre souz l'obeissance d'un Roy Ca-
tholique & de fait & de parole, contre tous he-
retiques & infideles. Telle doit estre la resolutiō
de toute la Noblesse Catholique de France, &
par vne si sainte resolutiō, elle se doit vnir avec
les Catholiques Seigneurs & peuples qui sont
maintenant en armes contre les heretiques &

2. Mach. 2.

Ibid. cap. 3.

1. Mach. 7.

2. Mach.

8.

leurs cōfederez, pour par vne neceſſaire & ſain-
cte guerre, nous pourchaſſer vne bōne Catho-
lique & ſalutaire paix du corps & ame tout en-
ſemble. Car s'ils veulent eſtre repūtez vrayemēt
nobles, & s'acquerir vne louange & gloire per-
petuelle, il leur faudra neceſſairemēt ſe mōſtrer
emulateurs de la loy, & preſts a expoſer leurs
vies pour le teſtament de leurs peres, comme
remonſtroit le noble Mathathias à ſes enfans à
l'heure de ſa mort. Ils ne doiuent par craindre les
menaces d'un heretique, relaps, ny faire grand
cas de ſes forces, car la gloire du meſchant n'eſt
que fiente, & cōme vn ver, il eſt eſleué aujour-
d'huy, & demain il n'eſt plus trouué, pource que
il eſt tourné en ſa terre & ſa penſee ſ'eſt eſua-
nouye. Et quant aux forces du Biarnoïs, il faut
penſer avec Iudas Machabeus, qu'il n'y a nulle
differēce deuant Dieu de nous deliurer en grād
nōbre, & en peu de gens, pource que la victoire
de la bataille ne conſiſte pas en la multitude de
l'armee, ains elle vient du ciel. Que ces belles le-
çons de Mathathias & de ſon fils Iudas ſont tres-
veritables, l'euenement de la treſſaincte & iuſte
guerre par eux entrepriſe pour la deſenſe de la
loy & religion de leurs maieurs, a tresbiē decla-
ré. Car Iudas Machabeus n'eut que ſept mille
hōmes quand il cōbattit Nicanor Capitaine de
Antiochus menāt avec luy vne armee de 2. mille
hōmes, & neātmoins avec l'ayde de Dieu il tua
plus de 9000. hommes, print Nicanor luy-meſ-
me, & mit en route le demeurant de ſon armee.
Et toutes les autres victoires infinies & grādes,
leſquelles Iudas & ſes freres gaignerent ſur les

ennemis de Dieu furent obtenues avec petites forces, aurespect de celles de leurs ennemis, sans ce qu'ils furēt onques vaincus, ou eurent iamais le pire, sinon deux ou trois fois seulement, l'vne au cōmēcemēt de leur guerre, quād d'vne trop grande scrupulosité de ne vouloir combattre le iour du Sabath, ils ne se sont pas defendus cōtre leurs ennemis, les assaillans, ains se sont laissez *I. Mach. 2.* massacrer par eux iusques au nombre de mille personnes qu'hommes que femmes & enfans. La deuxiesme fut quād Iosephat & Azarias par conuoitise de gloire, sans vouloir escouter à Iudas & ses freres, furēt mis en route par Gorgias, où ils perdirent quelques deux mille hōmes. La troisieme fois estoit, quant n'estant que 3000, hōmes choisis avec Iudas Machabeus, ils eurēt si grand pœur de l'arme de 20. mille pietons & 2. mille cheuaux, que Bacchides Capitaine general de l'ennemy menoit contr'eux, qu'ils ont delaisé leur tant vaillant Capitaine Iudas, ne demeurant avec luy que 800. seulement. Qui fut *I. Mach. 3.* cause que le valeureux Iudas [qui ne vouloit en façon quelcōque fuir deuant la face de son ennemy] apres auoir defait vne infinité des ennemis fut tué en bataille. Et ce non tant à cause du petit nombre qu'il eut, que pour la diffiâce que ce peuple sēbloit lors auoir eu de l'aide de Dieu qui leur donnoit tāt de victoires avec petit nombre. Outre ces trois pertes, ils n'eurēt iamais du *Ibid. cap. 9.* pire en bataille contre l'ennemy, & ne receurēt onques dommages si ce n'estoit par la trahison & perfidie du mesme ennemy contreuenāt à ce qu'il auroit promis. Car ainsi fit Triphō mourir

lib. 1. Mach.
cap. 12. & 13

rod. lib. cap.
vlt.

1. Mach. 12.

le valeureux Capitaine Ionathas avec ses deux enfans & plusieurs autres Juifs: ainsi fit Prothomeus meurtrir le vaillant Simon & ses enfans avec quelques autres de leur suite. Et c'est vne façon ordinaire à tous Tyrans, lesquels se doutas à iuste cause du merite de leur droit, mettēt tout leur espoir en trahison & perfidie, taschās par ce moyē de paruenir au bout de leurs desseins abominables, comme fait maintenant l'heretique Biernois, si nous sommes si despourueuz d'entendement, comme de nous vouloir laisser prendre par ses piperies fauses & mensongeres. Mais nonobstāt toutes les ruzes & trahisons lesquelles les Tyrans ennemis de Dieu ont practiqué contre les valeureux Machabees, le dire de leur pere Mathathias fut trouuē veritable. Car au commencement les plus grandes forces que Iudas Machabeus sceut mener en cāpagne, n'excederent le nōbre de 7. mille hommes. Et toutesfois en peu de tēps ils les ont tellemēt accreuēs, que son frere Ionathas eut moyen de mettre en bataille 40. mille hommes contre Triphō, en sorte que Triphō n'osa liurer bataille à Ionathas, ains par trahison l'a circōuenu & trompē, comme ie disois tantost. La iacoit que la mort de Ionathas sembloit menacer vne ruine entiere au peuple Ju lai que toutes les nations idolastres leurs circonuoiſines leuant leurs cornes contr'eux. Ce neantmoins, Simon frere de Ionathas n'en perdit courage, ains s'offrit tout prest, pour courir mesme fortune avec ses freres en la defense de la nation & religion. Et en peu de temps s'est si bien

bié employé pour la querelle de Dieu, qu'il deliura toute la Iudee de la tyrannie des idolastres dont elle auoit esté de long temps opprimée, chassant hors du chasteau de Ierusalem les infideles qui y estoient logez pour tenir captiue la ville & Tēple. De maniere que Simon, qui n'estoit que simple gentilhomme, fils de Mathathias de la race Sacerdotale, par imiter la vertu de son pere & freres, en combattant vaillamment pour la querelle de Dieu, & pour les loix, de ses maieurs, se vit en fin, du consentemēt vnanime de tout le peuple Iudaïque, Prince & souuerain Prestre de toute la nation des Iuifs & des Prestres. Et bien qu'il fust traistreusement massacré par la trahison du malheureux Ptolomee son gendre, comme il est demonstté, ce nonobstant son fils Iean Hyrcanus a cōmandé & gouuerné apres luy, & la principauté a tousiours demeurée en sa race, iusques à ce que la naissance du Messias nostre Sauueur approchant, elle tomba entre les mains d'Antipater Idumeen estrāger, & apres sa mort fut cōfirmée à son fils Herodes Ascalon par l'authorité d'Auguste & Antoine Romāi. Ainsi ont esté esleuez & exaltez au plus grand honneur les Machabees pour leur valeur en espousant la querelle de Dieu. Et au cōtraire, Antiochus, Nicānor, & leurs semblables, pour auoir prophāné le temple de Dieu, & tasché de exterminer la vraye religion, sont bié tost tournez en terre, & comme fiente & vers toute leur gloire est esteinte avec eux, finissant leurs iours fort ignominieusement. Car Antiochus apres

*Lib. 1. c. 1.
& 14. Ma
chab.*

2. Mach. c. 9. auoir tant persecuté le peuple de Dieu, en les forçant d'embrasser son idolatrie, fut en fin tellement tourmenté en son corps, que sa chair fust mangée des vers, dont issit vne telle puanteur, que ny son armee, ny luy-mesmes l'a sceut endurer, & ainsi finit il malheureusement sa meschante vie parmy les montagnes fort esloigné de son pays. Et Nicanor l'vn des Capitaines de ce malheureux Tyran, estant desconfit en bataille [cōme dit est] par Iudas Machabeus, pour les blasphemes & outrages insupportables qu'il auoit cōmis contre Dieu & son peuple, fut traité selō ses demerites, ayāt eu & la teste & la main droite tranchees, & fichees en haut deuant Ierusalē. De sorte que la gloire des Machabees cōme de gens valeureux & vrays seruiteurs de Dieu, demeure en perpetuité, & ne perira iamais, & celle du Tyran Antiochus avec ses complices perit bien tost, & fut tournee en vne ignominie & honte tout incontinent, laquelle demeure au iourd'huy, sans qu'on parle iamais d'eux, qu'à la confusion des meschans, en vne detestation perpetuelle de telles gēs. Et que l'on ne me die pas, que c'est aduenü ainsi aux Machabees seulement pour leur zele & amour de la vraye religion, & à Antiochus & tels autres tyrans pour la persecutiō d'icelle, les histoires de tous aages portent tesmoignage au contraire. Car la memoire d'un Constantin, d'un Valentinian, Gratian, Theodose, Leon, Iustin, Iustinian, Charlemagne & d'autres Princes Chrestiens qui ont espousé la querelle de Dieu en defendāt sa religion Catholique, demeure en perpetuité, & sera

Lib. 1. Mach.
cap. 7.

loüangee iusques à la fin du monde. Mais celle d'un Constantius, d'un Iulien, d'un Valens, d'un Anastase, d'un Leon Iconomach, d'un Genferic & Huneric, & d'une infinité d'autres heretiques & schismatiques, qui se sont bandez cōtre la vraye religion & Catholique doctrine de l'Eglise de Dieu, est ignominieuse, pource que toute la narration qui se fait d'eux, tourne à leur infamie & vitupere, à cause des heresies par eux defendues contre la vraye religion, & de maintes tyrannies & cruautéz barbares par eux commises à l'endroit des bons Catholiques qui ne vouloient suiure telles heresies. Ioint que tous ces heretiques là pour la pluspart ont malheureusement finy leur vie, & ont peu assez cognoistre que Dieu combattoit cōtr'eux. Cōme nous lisons de Iulien, de Valens, Anastase & plusieurs autres Empereurs & Rois heretiques & schismatiques. Et pour parler des Gentils-hommes & Seigneurs François tant seulement, qui pour leur prouesse en defendant la religion & Eglise de Dieu, sont paruenus au plus haut degré d'honneur, tout ainsi cōme quelques autres de grāds Seigneurs qu'ils estoient, par ce demonstret ennemis de la vraye religiō & fauteurs d'heresies, sont deuenus miserables & calamiteux, par zeler la vraye religion, & combattre les ennemis de la vraie & Catholique Eglise, la race de Charles Martel n'est pas seulement és personnes de Pepin & son fils Charles le Grand, des Maires du Palais tournee en Rois de France, mais encore ils sont esleuez à la dignité supreme de

l'Empire Romain. Et Godefroy de Bouloigne d'un Duc de Lorraine, pour sa valeur & magnanimité contre les ennemis de Dieu en Oriēt, est à la perpetuelle gloire de la natiō Françoisē créé Roy de Hierusalē. Tancrede & ses enfans Roger & Robert des Gentils-hommes de la Normandie sont par leurs grands exploits cōtre les Sarrazins & infideles deuenus Seigneurs de la Sicile & Calabrie, dont leurs enfans puis apres ont esté faits Rois. Simon Comte de Montfort pour ses valeureux exploits cōtre les heretiques Albigeois, & les Côtes de Tholoze & de Foix leurs fauteurs, deuint grand personnage, & par l'authorité du Pape Innocent 3. au Concile general de Latran fut déclaré Seigneur de Lâguedoc, & Raymond Comte de Tholoze, pour auoir supporté & fauorizé les mesmes heretiques, fut par l'authorité du mesme Concile déposé de son estat, & déclaré infame. Pierre Roy d'Arragō, pour auoir donné secours à son beau frere Raymond Comte de Tholoze en faueur desdits heretiques, fut tué en bataille avec plus de 18. mille de ses partisans, par ledit Simon, qui n'eut que 800. cheuaux contre 40. mille heretiques & leurs fauteurs. Lequel exēple tout seul doit destourner la Noblesse Françoisē de toute alliance & amitié de l'heretique moderne de Bierne. Car le Roy d'Arragon ne donna pas secours aux heretiques, & ne cōbattit pas en leur faueur, ains pour l'amour du Comte de Tholoze son beau frere, selon l'opinion d'aucuns. Et toutesfois pource que ledit Comte estoit fauteur des susdits heretiques, & pour tel excom-

munié & condamné par l'Eglise, le Roy d'Arragon pour luy auoir donné secours a esté par la diuine iustice ainsi tué, finissant ses iours ignominieusement. Il ne faut pas donc que ceux de la Noblesse qui ont esté, ou sont encore en armes contre les Catholiques vnís, s'excusent sur ce qu'ils disent, à sçauoir, n'auoir pris les armes en faueur des heretiques, ains pour l'amour que ils portoient à leur feu Roy Henry de Valois. Car puis que ledit Héry a tousiours esté, & s'est en fin monstré manifeste supporteur des heretiques, en adherant à luy, (qui pour tel crime & maintes autres enormitez estoit excommunié & condamné par l'Eglise) ils ont adheré aux heretiques mesmes ses complices, & pourtant comme ledit Roy d'Arragon pour tel fait mourut ignominieusement & en estat damnable, aussi doiuent ils craindre la mesme fortune, si de bonne heure ils ne se recognoissent, & se ioignent reallement & de fait avec tous les bons Catholiques maintenant vnís, pour la defense de la vraye religion, contre tant heretiques & leurs complices ennemis iurez d'icelle. Aussi ne serót ils pas exempts de la iuste reprehension & courroux de Dieu, pource qu'ils ne sont pas heretiques eux-mesmes qui ont donné secours audit Tyran & son beau frere le Biernois, ains il suffit à leur iuste reproche, qu'ils leur ont aucunement assisté, & se sont liguez avec eux. Car pour ceste seule occasion fut le Roy Iosaphat blasimé de Iehu, à sçauoir, qu'il donnoit support à l'impie Roy Achab, & se ligoit avec ceux qui haïssoient

2. Paral. c. 19

4. Reg. c. 9.

Dieu. Et Ochozias Roy de Iudee n'eut pas esté tué, comme il estoit, si Iehu ne l'eut trouué en la compagnie du meschât Ioram fils d'Achab. Ce n'est pas donc assez de n'estre pas heretique, mais il ne faut pas fauorizer les heretiques en façon quelconque, ains au cōtraire, on les doit fuir, detester & execrer avec tous leurs fauteurs amis & complices, crainte que par conuiuer & conuerser avec eux, nous ne soyons tant seulement condamnez comme participant de leur impieté, mais encore rigoureusement punis par la iustice diuine, pour ne nous estre opposez à leur meschanceté. Et quand le seruice qu'ils ont fait au feu Tyran seroit aucunement excusable, comme chose faite à luy, à qui iadis ils deuoiēt hommage & obediēce estant lors leur Roy, si est-il qu'estant maintenant par sa mort quittez & desobligez indubitablemēt de tout lien d'obediēce & seruice autresfois deu à luy, ils n'ont plus d'excuse pour les retarder de se conioindre & vnir avec les Seigneurs Catholiques. Car s'ils ont fait quelque promesse, ou presté aucun serment de tenir le party du Biernois, tant s'en faut qu'ils soiēt tenus de garder telle promesse maudite & illicite, qu'ils offensent Dieu mortellement, & encourront les censures & peines des fauteurs & supportemēs des heretiques, si avec intention de faire penitence de telle promesse, ils ne la faussent bien tost, & se ioignent avec les Seigneurs Catholiques leurs freres contre ledit heretique. S'ils n'ont fait nulle promesse à l'heretique, ils se doiuent bien garder d'en faire à luy, a qui ils ne peuuent obeir ny seruir, sans

grandement offenser Dieu & appertemēt contemner son Eglise. Ils n'ont maintenant plus à craindre comme mondains la vengeance que le Tyrā de Valois menaçoit aux Catholiques qui le delaissoient. Car Dieu d'une façon estrange, inesperee & quasi miraculeuse, nous a deliurez de ses menaces. Dieu de sa bonté infinie enuers son Eglise & Catholiques membres d'icelle en France, a suscité vn pauvre religieux, armé du zeile de Phinees, & du courage & force d'Aod, qui a fourré son cousteau tranchant si auant dedans les tripes d'Eglon, que les enfans d'Israël par vn si heureux coup sont deliurez de la seruitude tyrannique dont le Tyran les auoit longuemēt accablez, & de la crainte de plus grāde tyrānie qu'il leur menaçoit. Car si Dieu a exauisé les prieres des Israëlitites, quād il suscitoit Aod fils de Gera pour leur sauueur cōtre la tyrānie d'Eglon, & quād il encouragea la vesue Iudith, à trancher la teste à Holoferne, il est fort à presumer qu'il a exauisé les prieres des Parisiens & autres bons Catholiques de la Frāce, en excitāt vn ieune religieux enfant de S. Dominique en profession, qui d'un courage pas moindre que celui d'Aod, ou de Iudith, a tué nostre Eglon Henry de Valois, beaucoup plus cruel & pernicieux, que n'estoit ou le Roy de Moab occis par Aod, ou Holoferne tué par Iudith. Et personne ne le doit trouuer estrange, que ledit Héry ait ainsi finy ses iours, ains le doit plustost attribuer à la diuine iustice, qui a voulu que celui qui iniustemēt & contre droit auoit souillé ses mains du sang innocent de deux valeureux

Iudic. 3. 6.
Iudic. 13.

Princes dernièrement à Blois, sans respecter ou le lieu où ils estoient, ou le grade qu'ils tenoient, seroit comme vn excommunié, bany & diffidé par l'Eglise, iustement executé à mort en façon estrange. Car Dieu est merueilleux en ses œuvres, & prend vengeance du sang innocent lors que les hommes y pensent moins. Et coustumièrement il punit l'iniure faite à son Eglise & religion à l'heure mesme que l'ennemy se pense estre le plus fort, & s'assure plus de venir au bout de ses malheureux desseins. Chose fort considerable, & qui doit faire pœur à tous Princes & Monarques, [pour grands & puissans qu'ils puissent estre] de n'exceder iamais les bornes de iustice, ains de se porter tousiours en telle sorte enuers leurs sujets, qu'ils se mōstrent gardiens de leur peuple, & non pas loups & tyrās, qu'ils haïssent sur tout l'hypocrisie & dissimulation, & que rien ne leur vienne plus a contre-cœur, que perfidie & violatiō de leur promesse. Et que la vraye religiō sans aucune fainctise leur soit plus chere que tout honneur & grandeur mondaine. Car par auoir offensé en ces poincts icy, Henry de Valois d'un Roy de France s'est rendu vn tyran insupportable, & par sa tyrānie à conuertty l'amour & obeïssance tresgrande de son peuple en vne haine & tresiuste courroux, qui à la fin ont occasionné sa ruine.

F I N.